

1 KORÍNTIU

Inúxoti yutóxinoa Poûlu ne kutípoti Jesus íhae Koríntu

Poûlu turixôa ne imokóvokuti ya Koríntu yaneko koyuhópoinoa emo'u Itukó'oviti neko xanéhiko ovâti neko pitivóko. Yoko poéha xoénae meýá kôe óponea xapákuke yanekôyoke, kuteâti koeku noíxea úti ya Átu 18.1-18.

Yutóxinoake Poûlu ra koyuhópeti vo'oku pahúnevo po'ínuhiko xâne kutípoti Jesus yaneko imokóvokuti ya Koríntu, koane vo'oku háxakexeovokomaka. Éxokoa Poûlu nókone kó'iyea, motovâti ho'úxoepovohiko, kuteâti koeku nókone kó'iyea ne koati kaná'uti xanena Itukó'oviti.

Yoko tumúneke pahúkinoa Poûlu ne yútoe, ápe koyuhópeti yútoe íhae Koríntu, páhoe xoko Poûlu. Yane koyuhópeti, épemohiko Poûlu kó'inoaku isóneu ne koekútihiko, âha éxeahiko. Enepone épemoake, yumópa Poûlu ya kapitulu 7. Kene ya kapitulu 12 yonoti 14, koyúhoinoamaka Poûlu ápeyea íparaxoake Sasá'iti Omíxone Itukó'oviti ne póhutihiko kutípoti Jesus, éxone itúkea ítukeke Itukó'oviti. Ya kapitulu 13, anêko yúho koêku ne koati kaná'uti seanákoti. Kene ya kapitulu 15, éxokoa Poûlu itúkeovo kaná'uteoxo exépukeopea ne Jesus ukópea xapa ivokóvoti, koane vexépukeopeamakamo, uti kutipoâti, vo'oku inuxó kó'inovi Jesus exépukeopea.

1 ¹Yundóxinopinoe, undi Poûlu. Undi iháxiupo Jesus, páhoe koyúhoyea emó'u xapa xâne, kuteâtimaka ahá'inonu Itukó'oviti. Anéyemaka njokóyoke ne Sósteni, po'ínu úti xoko Jesus. ²Pahúkinopeanoe úti ra koyuhópeti, itínoe ho'uxínovoti ítuke Itukó'oviti ya pítivokonake Koríntu, itínoe kasása'iupo Kristu Jesus, koane iháxiupomaka Itukó'oviti itúkeovo sasá'iti nonékuke, xané kixeâti ne uhá koeti po'ínuhiko úti, koêkuti óvohikoku ikóseanaxeovo Vúnae Jesus Kristu, Únaehiko koane Vúnae.

³Itúkapu hána'itike seánakopi Itukó'oviti, Ha'a úti, yoko Vúnae Jesus Kristu yóvoheixo, koánemaka úhепetike isoneúti ukeâti xokóyoke.

Seánakoa Itukó'oviti ne ihæ Koríntu

⁴Kóyekune íngoro'ixinovopinoe xoko Itukó'oviti, vo'oku hána'iti seánakopi xoko Kristu Jesus. ⁵Vo'oku koeku héki Jesus, yupihovó koe iké'iparaxikono ikéneke ya uhá koeti koekúti, kuteâti itfívivo koati exoâti koyúhoyea emó'u, koane heú kíxi yéxi kaná'uko ra ihíkavvoti hékone. ⁶Koati kitipoâtinoe ne ihíkavvoti koeku Jesus, koane títiu kéye ikéne. ⁷Énomone ákoino ápahuina iparáti konokóvotiko xepákuke yane póneake Itukó'oviti ne xanéna éxea itúkea ítukeke. Énomone kénenoe ye ya koêkuiko kíxoixopinoe aúkopovope Vúnae Jesus Kristu. ⁸Yoko énomonemo koxunákopinoe tukú koeti hunókokuke, motovâti itfívivo xâne ákoti koyuhôati ápeyea óvaku pahúnevo yaneko káxe aukápapu Vúnae Jesus Kristu. ⁹Koati motovâti kúveovokono kíxeopineye ne Itukó'oviti, enepone ihaxíkopitinoe poéhayeane iséneu xoko Xe'éxa, enepone Vúnae Jesus Kristu.

Ixíko'okokono ne hokotíhiko Jesus vo'oku ixómoyea haxákeovokoko

¹⁰Ítínoe mbo'ínu xoko Jesus, injíko'okopinoe ya iháke Vúnae Jesus Kristu ákoyea ópoe'ainokoko yiúho, koane ákoyeamaka héxakexipukoko. Konókoti kutikókó ké'iyinoe ikéneke Vúnae, koane poéhayanemaka yónoku iséneu yoko yâha itfíki ítukeke. ¹¹Kó'inokeneye yunzó'inopi, vo'oku éto'okonu xâne ukeâti óvokuke Kolôe ápeyea puvokókoti xepákukenoe. ¹²Hara ngíxo, vo'oku ápeyea xepákuke ixómoti koyê: “Undi hokoti Poûlu” koyêti. Kene po'ínuhiko: “Undi hokoti Ápolu” koyêti. Kene po'ínuhiko: “Péturu nzóko” kóye. Ina apémaka koyúhote itúkeovo hokoti Kristu. ¹³Yusíkoikopomea háxakexeovo ne Kristu? Undí'ikopo kuruhúxinovopinoe? Inzákeikopomea yáhikikono? Ako kalíhuina!

¹⁴Íngoro'ixinovo Itukó'oviti vo'oku ákoyea ánjiu xepákukenoe. Poéhane Kiríspu yoko Ngáyu ánjiko. ¹⁵Koeku kó'iyeaneye, ako xâne motovâti koyúhoyea áhikeovo ya inzáke. ¹⁶Ápepini Étefana koane uhá koeti ovâti óvokuke, ánjumaka nê'e. Ava po'ínu, ákone énjapana. Kutí'inonu koékune nekôyohiko. ¹⁷Vo'oku haina ánjikea xâne pahúkinonu Kristu, itea ngoyúhoyea ne inámati ihíkavvoti omínovike, ene pahúkinonu. Hainámaka ingo'ítukexoti exóneti ikó'ítukeu xâne hána'iti ko'éxoneti yara kúveu mêum, mará'inamo akútea énomone kutí'inoke itóvoti ne xanéhiko. Eneponi akoéneye yúnzo, mani kutí ngxoâti ákoti itúkovo ne ivókinovovi Kristu ya kuruhúke koíteovo xâne.

Kristu itukóvo xunako Itukó'oviti koíteovo xâne

¹⁸Eneponi yuhu úti vo'oku ivókinovovi Kristu ya kuruhúke, ya xapa xâne yonópotihikomo ipihóponovokutike, kutí kó'inoahiko hókone xâne ákoti aunáti isóneu. Itea xoko úti, uti koítovone Itukó'oviti, koati hána'iti xunako Itukó'oviti nê'e. ¹⁹Yoko énomonemaka koéneye ne yuhu Itukó'oviti ya emó'uke, enepone koêti:

“Unge'éxeatimo éxone ne hána'itihiko ko'éxoneti. Kúteanemakamo ngíxoaku ko'ísoneuyea ne hána'itinoe ko'isóneuti” kôe.

Izâiya 29.14

²⁰Koeku kó'iyeaneye, ná'ikopohiko ne hána'iti ko'éxoneti yara kúveu mêmum? Ná'ikopohikomaka ne hána'iti ihífaxoti koánemaka ne ahúkoti ya koyúhoyea? Áko'onehiko nê'e, vo'oku enepone kó'exoneyea ne xâne yara kúveu mêmum, sá'iri'okopane Itukó'oviti ya koekúti ákoti itóponone.

²¹Ya hána'iti ko'ísoneuyea Itukó'oviti, haina vo'ókuke ne éxone xanéhiko yara kúveu mêmum, kutí'inoke itopónotihiko éxea Itukó'oviti. Itea ínixoá Itukó'oviti unáko itúkeovo ya koyúhoyeovo emó'u, itínovoke ya pahúnevo ne xanéhiko kutipoâti, upánini ínixeá po'ínuhiko xâne itúkeovo kixovókuti hókone xanéhiko ákoti isóneu.

²²Vo'oku poéhane noíxea iyupánevoti kahá'a ne jûdeuhiko. Kene ne ngerêkuhiko, poéhane itóponeá hána'iti exóneti, ene kahá'a. ²³Itea hane koyúho úti xapa xâne Kristu yoko ivókinovovi kuruhúke. Enepora ihíkauvoti íkoroko jûdeuhiko, koane ínixoá ngerêkuhiko itúkeovo hókone xâne ákoti aunáti isóneu. ²⁴Itea xapákuke ne xâne iháxiupo Itukó'oviti hókea, enepone jûdeuhiko koánemaka ne po'ínuhiko xâne ákoti itukapu jûdeu, koati Kristu koyúho úti, enepone hána'iti xunako Itukó'oviti koíteovovi, évekoakumaka Itukó'oviti kouhupu'ikea ne hána'iti kó'exoneyea. ²⁵Vo'oku enepone ítukeinovoti Itukó'oviti xoko Kristu, ínixonone po'ínuhiko xâne itúkeovo hókone xâne ákoti isóneu, koati hána'iti anú'ukea kó'exoneyea ne xâne yara kúveu mêmum. Koáne enepone koekúti ínixonehikomaka itúkeovo muyá'iko Itukó'oviti, énomone yupihóvo anú'ukea xunako xâne.

²⁶Itínoe mbo'ínu xoko Jesus, yokómomapihi kêkunoe iná ihaxíkopi Itukó'oviti héki. Vo'oku ako axú'ina xâne hána'iti ihífaxovoti, koane payásotihiko xepákukenoe, koane xe'exa iríku kalísoti kixoku koéxokexeokono. ²⁷Itea hane noívokoxo ne Itukó'oviti xâne ínixonone po'ínuhiko xâne yara kúveu mêmum itúkeovo ákoti isóneu, motováti kóteyokeokono ne xâne hána'iti ko'isóneuti. Koáne, motováti kóteyokeamaka payásotihiko yara kúveu mêmum, noívokoxoa Itukó'oviti ne xâne ínixonone po'ínuhiko yara kúveu mêmum ákoyea xunáko. ²⁸Kene ne inixóneti ákoyea itúkokonoke, koane puvonéti, yóko'o ne koâti yupihóvoti kalíhuyea, enepohikone kutí koeti akó'oti, énomonemaka noívokoxo Itukó'oviti íkorohikea ne yupihóvoti xunáko, uke'éxopeati xunáko yoko itúkeovo teyonéti. ²⁹Kixínoakeneye Itukó'oviti maka hákone oxéne iháyu'ikopeovo ne xâne nonékuke. ³⁰Kene itínoe, yaínovone kasása'iupo Itukó'oviti vo'oku ítukeinovoti Kristu Jesus. Énomonemaka poréxo ne Itukó'oviti itúkeovo úkeaku kó'exoneyea úti koane kutí'inoke ponopóvoti úti yoko sasa'ipotí úti nonékuke. Énomonemaka kutí'inoke viteóvati ne pahúnevo úti, ³¹maka akúteane koêku ne yutoéti emó'uke Itukó'oviti xoko kó'iyekaku: “Enepone kahá'ati ápeyeya iháyu'iu ya xokóyoke, itúkapu ítukeinoa Vúnae iháyu'iko” kôe.

Koeku yuho Poûlu koyúho ítuke Itukó'oviti xapa xâne

2 ¹ Itínoe mbo'ínu xoko Jesus, yaneko ngoyuhópoinopeanoe ra ihíkavoti ukeâti xoko Itukó'oviti, haina kalísotinoe emo'úti ôriti éxeokono veínoam, koane hainámaka kuteâti koyúhoyea hána'iti ko'éxoneti yara kúveu mêum veínoambinoe ngoyúhoyea. ² Vo'oku ngoúsokone inzóneu yanekôyoke ákoyeamo po'i énjokopike, ákoti itukapu koeku Jesus Kristu yoko ivókinovovi ya kuruhúke. ³ Yaneko ámbeyeaku xepákukenoe, yupíhovo eómbea kutí ngó'iyea xâne ákoti xunáko. Vo'oku ina njonóno'oko, koane hána'iti mbíkea, ininjoâti ákoyea índa indúkea ne itukéti. ⁴ Enepone ngixoku ngoyúhoyea, koánemaka ne ihíkavoti ngoyúhoinopikeno, ako akútea yuho hána'iti ko'éxoneti ahúkoti koyúhoyea, itea koati iyúseoti ápeyea njokóyoke ne Sasá'iti Omíxone Itukó'oviti koánemaka xunáko. ⁵ Kó'inokeneye ngoyúhoyea, motovâti ákoyea itúkapu vo'oku hána'iti exóneti ítuke xâne yara kúveu mêum kitípino Jesus, itea itúkapune vo'oku xunako Itukó'oviti.

Koêku ne kaná'uti exóneti ukeâti xoko Itukó'oviti

⁶ Itea kóyeane koyúhoyea úti koati hána'iti exóneti xapákuke xâne koukóponovoti ikéneke Itukó'oviti, enepohikone xâne úsotine ikéneke. Yoko ako akútea exóneti kuteâti itóponone xâne éxea yara kúveu mêum. Hainámaka kuteâti éxone ne koati payásotihiko xâne yara kúveu mêum, xâne ákotimo oríko uké'eyea xunáko. ⁷ Itea hara koyúho úti hána'iti exóneti ukeâti xoko Itukó'oviti ákoti exoâti mekúke, itea kouhápu'ikovotine kó'oyene. Énomone ne úsotine isóneuke Itukó'oviti ukeátinekene tumúneke ápeyea ra mêum, kaha'aínoviti vitúkeovo hána'iti ihayú'iuti nonékuke. ⁸ Yoko enepone hána'iti exóneti ngixínopikeno, ako ápahuina xâne xapákuke ne payásotihiko yara kúveu mêum iyukínovati isóneu éxea koêku. Eneponi exáhiko, ákoni kurúhuxa ne koati êno hána'iti ihayú'iuti Vúnae. ⁹ Yoko koati kuteâti ne yutoéti ya emó'uke Itukó'oviti, enepone koêti:

“Ako xâne noixoâti, ako kamoâti, ákomaka xâne itopónoati isóneu éxea koêku ne koekútihiko kouókinoake Itukó'oviti ne xâne ákoti omotóvo okovo Itukó'oviti” kôe.

Izâiya 64.4

¹⁰ Itea kouhápu'ikinovea Itukó'oviti ya xunákoke Sasá'iti Omíxone ovo'ó koe'éviti. Vo'oku ako ápahuina koekúti ákoti exâ ne Sasá'iti Omíxone. Simóya ne hána'iti isoneútihiko ya xoko Itukó'oviti ákoti po'i exoâti, éxo Sasá'iti Omíxone Itukó'oviti. ¹¹ Kene xapákuke úti, uti xâne yara kúveu mêum, ako ápahuina éxoti isóneu po'i xâne. Poéhane únae ne isoneúti exôa. Kúteanemaka koêku ákoyea éxoti isóneu Itukó'oviti ákoti itukapu Sasá'iti Omíxone. ¹² Yoko haina exóneti íhae ra kúveu mêum ko'ípara úti, itea koati Sasá'iti Omíxone Itukó'oviti ko'ípara úti, motovâti véxea koeku uhá koêti ne ikó'íparaxovike Itukó'oviti ya hána'iti seánakovi.

¹³Énomonemaka koyúho ûti xapa xâne. Yoko enepone yuho ûti, haina fhikaxovike xâne hána'iti ko'éxoneti yara kúveu mêum, itea fhikaxovike Sasá'iti Omíxone Itukó'oviti. Koati xapákuke xâne ovo'ó koékumaka ne Sasá'iti Omíxone Itukó'oviti kouhupu'ikea ûti ne kaná'uti kixovókuti kouhupu'ikinovike nê'e. ¹⁴Enepone xâne ákoti ainámapo xoko Itukó'oviti, ako namúka ne ihíkavoti ukeâti xoko Sasá'iti Omíxone Itukó'oviti. Kutí kó'inoa hó'e xâne ákoti isóneu. Koati ákoti exína isóneu, vo'oku áko'oyea ne Sasá'iti Omíxone Itukó'oviti ya xokóyoke kourápu'ikinoati. ¹⁵Kene ne xâne kuri'ókovati ne Sasá'iti Omíxone Itukó'oviti, ínioxo ponóvoku ne uhá koeti koekúti. Itea xapákuke xâne ákoti akoéneye, ako ápahuina motovâti pónea isóneunoa ne xâne kuri'ókovati ne Sasá'iti Omíxone Itukó'oviti. ¹⁶Yoko énomone kuteâtimaka koêku ya emó'uke Itukó'oviti, enepone koêti:

“Ako itopónoti éxea isóneu Itukó'oviti. Ákomaka motovâti enékea” kôe.

Izâiya 40.13

Itea anéye ne isóneu Kristu xoko ûti, uti kutipoâti.

Ovóxehiko Itukó'oviti

3 ¹Kene itínoe mbo'ínu xoko Jesus, koati metokeâti kutí ngíxeopinoe yunzó'ixoti xâne ákoti kuri'ákapa ne Sasá'iti Omíxone Itukó'oviti. Ngónoko kutí ngíxeopikonoe yuhó'ixoti xâne hokotí'iko koêkuti âha kíxeova, koane kuteâti kalivôno ávoti koati éxone ikéneke Kristu. ²Enepone ngxixoku ínzikaxeopinoe yanekóyoke, hane ínzokoa kuteâti koeku leite níkaxeokonoke ne inámatiko kalivôno ávoti íta níkea xúnati nikokónoti. Vo'oku eneponi akutêa koati nikokónoti, nika úsotine xâne, ákoni íteano. Yoko anéyeiko ávoyea ítea, vo'oku itínoe xâne hokotí'iko koêkuti âha kíxeova. ³Koeku ápeyea xâne xepákukenoe ixómoti iyókovo ítukevo po'ínuhiko xâne koane poé'ainoa isóneu vo'ókuke, koane koeku ápeyeamaka xâne ixómoti orixókoko, hainá'ikopo itínoe xâne hokoti koêkuti âha kíxeova? Enepone kixeku itíkivonoe, ákoikopomaka kutí ákoe kixóvoku xâne ákoti ainámapo xoko Itukó'oviti?

⁴Koeku ápeyea xepákukenoe ixómoti koyê: “Undi hokoti Poûlu” koyêti. Kene po'ínuhiko: “Undi hokoti Ápolu” koyêti, ákoikopomea iyúsea itíkivonoe kutí koeti xâne ákoti ainámapo xoko Itukó'oviti?

⁵Kutí'ikopo íkitixavi, ûndi yoko Ápolu? Pohúneteoxo uti ovoxe Itukó'oviti koyuhó'iyeyati emó'u, enepone kitíponenoe. Yoko póhutihiko ovóxe, anêko ítukexeake Itukó'oviti. ⁶Kutí koe undi noâti ne emo'u Itukó'oviti koeku ngoyúhoyea xepákukenoe. Ina keno'óko Ápolu ingyénepoke ixómoti ovo'íkoa. Itea poéhane Itukó'oviti porexôa ukóponea ne itukéti. ⁷Iyúseoneikopo ákoyea itúkapu vo'oku noâti, koane vo'oku ovo'íkoati kutí'inoke apêti êho, itea poéhane Itukó'oviti porexôa ukóponea ne itukéti. ⁸Enepone noâti koáne ne ovo'íkoati, kutíkokone nonékuke Itukó'oviti. Yoko póhutihiko ko'ítuketi, apêtimo námoepo. Hanemo exôa koêku ne námoepo,

kixoku ko'ítukeyea. ⁹Vo'oku uti kaha'íneati ne Itukó'oviti ya ítukeke. Kene kutí koe itínoe isane Itukó'oviti. Kutí kénoemaka péti koéxepoe Itukó'oviti.

¹⁰Ya hána'iti seánakonu Itukó'oviti, poréxonu inúnjinoa yoko indúkinoa poéheve ne itukéti, kuteâti koeku koexépukoti péti mbiú kixoâti ítúkea ítuke. Ina keno'óko kókóponoati ne itukéti ndûriu. Yoko póhutihiko ko'ítuketi, konókoti kóhiyanayea kíxoku ko'ítukeyea. ¹¹Vo'oku ako yusíka ípiheokono po'í poéheve ákoti itukapu kóukopono ne turiútine. Yoko enepone poéheve ne itukéti ngíxone, énomone ne Jesus Kristu. ¹²Xapákuke kókóponoati ne itukéti, anêko mbiú kixoâti ko'ítukeyea kuteâti koeku xâne iko'ítukexoti únatinoe koekúti kuteâti ôro, péhu yoko uhé'ekotinoe uhá'iti mopôdi yane koéxepoe. Ina apémaka kuteâti xâne veinoâti koekúti ákoti koati unátiiyaa, kuteâti tikóti, hí'e yoko tuti exáte. ¹³Yoko póhutihiko ko'ítúkeinoti Itukó'oviti, urapú'itinemo kixoku ko'ítukeyea yaneko káxe aukápapu ne Vúnae Jesus Kristu. Yúkumo veínokono kóuhapu'ikeokono kixoku ko'ítukeyea ne póhutihiko xâne. Énomonemo kóuhápu'ikoa ítúkeovo kuteâti xâne veinoâti hí'e ne ko'ítukeyea, áko'o ítúkeovo kuteâti xâne veinoâti ôro. ¹⁴Enepone kixoku ko'ítukeyea ne póhutihiko xâne kókóponoti ítuke Itukó'oviti oúkeke ne poéheve, enepo akutêa kixovókuti ákoti itâ yúku oró'okea, apêtimo námoepo xoko Vúnae. ¹⁵Itea enepo akutêa kixovókuti oro'ókovoti, hána'itimo évonevo, itea kóyeanemo koíteova Itukó'oviti neko xâne, upánini kutí koetimo huvokó kixópoti yúku íteovomo. ¹⁶Ákoikopo yéxanoe itíkivo sasá'iti óvoku Itukó'oviti koane ítúkeovo ovo'ó koépitinoe ne Sasá'iti Omíxone? ¹⁷Enepo áva xâne kotohíneati ne sasá'iti óvoku Itukó'oviti, itukópinoatimo Itukó'oviti ésa'i ne ítuke, vo'oku koati sasá'iti ne óvoku Itukó'oviti. Yoko koati itínoe ne sasá'iti óvoku Itukó'oviti ngíxone.

Haina exóneti íhae xapa xâne yara kúveu mêum koiótóvovi

¹⁸Hákoikopo yaupú'ikopovo. Koêkuti xâne xepákuke inixópovoti ítúkeovo koati ko'éxoneti xapa xanéhiko yara kúveu mêum, haina énomone ne koati kaná'uti exóneti nonékuke Itukó'oviti. Motovâti itóponea xâne ne kaná'uti exóneti, konókoti usó kóyeyea ínixeokono ítúkeovo ákoti isóneu ya nonékuke xanéhiko yara kúveu mêum. ¹⁹Vo'oku enepone exóneti, opósiu xanéhiko yara kúveu mêum, ako ítúkoake Itukó'oviti, kuteâtimaka kó'iyea ya emó'uke Itukó'oviti, enepone koêti: “Enepone hána'iti ko'éxoneti xapa xâne yara kúveu mêum, koati éxone veyópinoa Itukó'oviti íkorokopea” kôe. ²⁰Epó'oxo hara koémaka po'íke: “Éxoa Itukó'oviti oveâti isóneuke ne hána'iti ko'éxoneti yara kúveu mêum, ítúkeovo ainóvoti isoneûti ákoti ítúkovoake” kôe. ²¹Hákoikopo iheyú'iko koêkuti xâne keyuhoâti ítúkeovo énomone hekónoe. Vo'oku uhá koeti koekúti, ánovovo pónepike Itukó'oviti ²²yusíkoti ítúkeovo ûndi, undi Poûlu, áko'o Ápolu, áko'o Pêturu. Kúteanemaka koeku uhá koeti ovâti ra kúveu mêum, koáne ne yápéyiko yara kúveu mêum, koáne ne pihépi xoko Itukó'oviti. Kúteanemaka koêku ne koekútihiko apêti kó'oyene, koánemaka koekúti keno'ókotikomo

ikénepoke. Aínovone pónepike Vúnae. ²³Yoko Kristu itíko Yúnae. Kene Itukó'oviti, enepone payásoti ya uhá koêti, énomone itúko Únae ne Kristu.

Koêku ne páhoehiko Kristu koyuhó'iyeani emó'u

4 ¹Konokoâti éxea xanéhiko vitúkeovo pohúneti ovoxe Kristu, ûndi yoko po'ínuhiko ko'ítuketi ítuke Itukó'oviti. Kovóxevi Itukó'oviti koyúhoyea úti xapa xâne ne íhíkavoti íhae xokóyoke, ákoti exákana mekúke. ²Yoko póhutihiko ovoxéti, konókoti ítúkeovo kuvovóneti úsexeamo ne páhoenokono ítúkea. ³Yusíkoti ínixinoe kó'iyeaneye ne ngo'ítukeino Itukó'oviti, áko'o ákoyea ákoeneye, yusíkotimaka ítúkeovo po'ínuhiko xâne koené'eye isóneunonu, ako mbepákexina inzóneu nê'e. Muhíkova inzóneupinovo, ákomaka nguvápa nê'e. ⁴Kaná'uti ákoyea ápahuina váhere koekúti njé'onone inzóneuke, itea kóyeane ákoyea ongóyuhu tokópeovoxo uhá koeti índuke, vo'oku poéhane Itukó'oviti motovâ koyúhoyea tokópeovoxo, áko'o ákoyea. ⁵Hákoikopo itikóvo xâne húketi isóneuno po'ínuhiko xâne, inixeâti ákoyea aúnnati ítuke koeku ákoyea koati yéxi koêku, vo'oku haina kaxénane yúhoikopeokono xâne. Itea aukápapune ne Vúnae, ínamo kauhápu'ika ne koekútihiko ítukókonoti hahákutike, ákoti po'i exoâti yara koeku kó'oyene, koane énomonemakamo kauhápu'ikoa ítukóvotiye ne isoneútihiko oveâti isóneuke ne póhutihiko xâne. Yane ihayú'ikoatimo Itukó'oviti ne póhutihiko xâne kuteâti motókeyea iháyú'ikeokono.

Saya'íkoo Poúlu ne íhae Koríntu

⁶Ítínoe mbo'ínu xoko Jesus, enepora koati ânja énjokeopinoo yara yúndoe, ínzokoa ngxoku indúkeovo koánemaka kixoku ítúkeovo Ápolu, motovâti ítúkeovo koeku úti kauhápu'ikinoopea kixó'ekone ne yutoéti koêti: “Konókoti ítúkeovo yutoéti emó'uke Itukó'oviti hokokóno, enepone ixikó'okoviti ákoyea kapáyasaka úti ne po'i xâne koeku ákoyea vitúkoake ne po'ínuhiko” koêti. ⁷Hainá'ikopo kehá'ati íkitixapivo únati ya po'ínuhiko xâne? áko'o ápeikopomea yéxone itíki ákoti itukapu pónepike Itukó'oviti. Ako kalíhuina. Yoko itukovo ke'ipârati, ná'ikopo koeti kepáyasokinovo kutí'iyea itepónoati ya xinákoke?

⁸Inípono iséneupinovo kutí kél'iyi ákotine nókone ikéneke Itukó'oviti, inixépovoti itéponine uhá koeti ahá'ínopi Itukó'oviti, koane itéponinemaka itíkivo náti ya xoko Kristu! Yoko ako'ópo vinixápapu, ûndi yoko po'ínuhiko ápostulu! Ehá'ani netíxixo kuteâti iséneupinovo, motovâtimaka kahá'ineyeopi úti xoko Kristu, ûndi yoko nza'íne ítukeke Itukó'oviti. ⁹Itea ya undíke, énjoo ítúkeovo Itukó'oviti porexó'ovi vitúkeovo okoti koati íkenétike ya uhá koeti xâne, uti ápostulu, uti páhoe koyúhoyea emó'u. Kutí koe uti iká'aeti iyonókonoti xoko koépekokonoku, koeku komómoponea uhá koeti xâne ovâti ra kúveu mêum, koánemaka ánju íhae vanúke, enepohikone ovoxe Itukó'oviti. ¹⁰Vo'oku hókea uti Kristu, uti ápostulu, koati uti xâne inixóneti ákoyea isóneu. Kene inípono ítínoe, koati inixépovoti itíkivo ko'éxoneti ikéneke Kristu!

Utímaka xâne inixóneti ákoyea itóponone koane ákoyea xunáko, uti ápostulu. Itea inípenonoe, koati inixépvoti itíkivo hána'iti itóponone ikéneke Kristu koane êno xináko, ikítixapovotimaka koati teyonéti! Kene úti, uti puvonéti. ¹¹Enepora úti, uti ápostulu, tukú koeti kó'oyene, uti épeu hímakati koane úne. Ye'ékonemaka ipúpa'ixea vípovo. Utímaka yehepóke'exokuti. Ákomaka koati vóvoku. ¹²Vivókoponovomaka ko'ítukeyea úti, vitúkoti ésa'i nókone úti. Enepo vihakókono, ako vitúkapina ésa'i ne ihakó'oviti, itea vépeminoa unako koêku xoko Itukó'oviti. Enepo vikoítotonokono kotíveti, vítoa tarú'uxea uhá koêti. ¹³Enepo apê itukóheoti koeku úti, itupa'ii kíxoa yumópea úti, voposkoti unátipinokoko visóneu. Tukú koeti kó'oyene, ya isóneunovi xanéhiko ákoti éxa Itukó'oviti, uti kuteâti sipurákineti, uti ápostulu. Uti kutí koeti koekúti kuréti yupihóvoti kótirinayeokono.

Enékoa Poúlu ne íhae Koríntu

¹⁴Haina ngahá'ati ngóteyokeopinoe ngixínopikeneye yara yúndoe, itea enengópiti vo'oku kutí ngixópinoe koati nje'éxaxapa ákoti omotóva ongóvo. ¹⁵Yusíkoti yupíheovo enó'iyea ihíkaxopiti ikéneke Kristu, itea poéhaxo ne itukópitinoe xe'éxaxapa. Yoko énomone ra yuhó'ixopiti, vo'oku undíne koyuhó'inopi koeku Kristu Jesus enepo inâ kitipôa.

¹⁶Injíko'okopinoekopo héki ngixoku nzókea Itukó'oviti. ¹⁷Énomonemaka kutí'ino mbahukínopitinoe Timóti, enepone po'ínu úti xoko Jesus, enepone kutí ngíxonemaka nje'éxa ákoti omotóva ongóvo. Koati kuvonóneti nê'e, yuixóvoti ko'ítukeino Vúnae, koane huvo'óxopitinoemo puyákoponeova yokóvo ne ngixoku nzókea Kristu Jesus, kuteâtimaka ínzikaxea ya uhá koeti yónongu ya póhutihiko imokóvokuti nzímoku.

¹⁸Anêko xâne kapayásokopovoti xepákukenoe po'okoâtihiko ákoyeamo nainjapanapinoe. ¹⁹Itea ákomo áxu'ikene, noinjóponopitinoemo enepo itukapu ahá'inonu Itukó'oviti. Yane enjoâtimo ápeyea xunáko neko kapayásokopovoti itúkeaxo kuteâti neko yúho, áko'o itúkeovo pohúneti koyuhóheoti ákoti xunáko itúkea. ²⁰Vo'oku enepone vitúkeovo xanena Itukó'oviti yonópoti natíxokuke, haina pohúneti koyúhoyea úti, itea konókoti ipúhikea xunako Itukó'oviti ya kixoku vitúkeovo. ²¹Kutí'ikopo kehá'anoe? nzímea xepákuke orínjeopimo? áko'o itupa'ii ngíxeopimo kuteâti koeku xâne ákoti omotóvopinoe okóvo.

Koeku xâne kutípiti Jesus koesáyu'ixoti kixoku itúkeovo

5 ¹Koati apêti koyuhópitinoe ápeyea xâne xepákukenoe ákoti saya'íkapeapa ne úhepune múyo vo'oku ixómoyea kaha'a sêno. Yoko enepora ákoyea káyusea kixoku itúkeovo, koati yupihóvoti koêku, ákotimaka kámeaku úti kuteâti, muhíkova xapa xâne ákoti éxa Itukó'oviti. Hane ngíxo vo'oku ápeyea ixómoti kapíne énoxaka. ²Yoko inípenonoe, uhepee kóye iséneu! Ako kalíhuina ikétivexinoe iséneuke ne váhere koekúti xepákuke. Mani kenokoâtinoo ikétivexi,

motovâti kópuhikeokono xepákuke ne yupihóvoti váherexea ítuke. ³Kaná'uti ángo'oyea yâko xepákuke, itea ya isoneûtike, kóyeane kutí kó'iyea ambêti xepákuke. Epó'oxo ngoyuhó'inopitine inzóneunoa kutí'iyea ambêti ya: Koati pahukóvoti ne kixotíneye ítuke. ⁴Hara ngxópinoe ya iháke Vúnae Jesus: Enepo he'uxínapa ra koekúti, kutí koetímakamo ambêti xepákuke, koane apêtimakamo xunako Vúnae Jesus youúkeke. ⁵Yane képuhika xepákuke ne ákoti ikatífvexa isóneuke ne váhere ítuke. Kirí'akamaka Satánae komóhiyeya múyo, motovâtimo eópea ítúkeovoxo koati pahukóvoti koane kóyuseopeovomo, motovâtímaka ápepeamo xapákuke ne kasása'iuipo Itukó'oviti yaneko káxe aukárapu Vúnae.

⁶Ako aúnnati ne iséneupinovonoe, ikítixapovoti xâne koati únati kóyeku ikéneke Vúnae ákoti konokínovopitinoe. Ákoikopo yéxa koêku ne pahunévoti ítúkeovo kuteâti kalihú koeti kohiyákopeti pâum heú kíxea kohiyakea ánahi? ⁷Kiríkapaikopo ne uhá koeti kúxoti kixeku itfkivo, enepone kutí koeti kohiyákopeti xepákuke, motovâti itfkivo inámati masa ákoti kohiyákoati. Yoko énomone kénenoeye koeku ítúyoepa ne pehúnevo. Vo'oku enepone Páskoa, usóne kixó'ekone xoko úti koeku ivókinovovi Kristu, enepone kutí kixonéti kali xe'exa su'úso koépeuti ya Páskoa, ésa'i ítúyoepa pahunévoti. ⁸Vokóyuineikopo kuteâti koêku ya kaxena Páskoa. Itea enepone kixoku kóyuiyeya úti, ako yusíka ítúkeovo ya kúxoti kixoku vítúkeovo, enepone kutí koeti kohiyákopeti. Énomone ne váherexea vítúkeino po'ínu úti yoko po'ímaka váhere vítúke. Itea hara vítúka kixoku kóyuiyeya úti, vítúkeovo xâne ákoti semekékexa, koane pónea uti kixoku vítúkeovo. Énomone akútea ne osó'iuiti pâum ákoti kohiyákoati, koyúipeti ya áyui Páskoa.

⁹Ya po'íke yúndoenopi yanekóyo, mbahúkopinoe ákoyea yánahixapa ne xâne ákoti kayúsea kixoku ítúkeovo, kapíneti ákoti itukapu koati múxone. ¹⁰Itea haína xâne yara kúveu mêum ákoti éxa Itukó'oviti ne ngxíxo, enepohikone kapíneti ákoti itukapu koati múxone, koáne ne xâne ixómoti ipupákino isóneuh kahalá'ayea enó'iyeya tiúketina, yóko'o ne ómevoti, koánemaka ne xâne kuvóvoti sánduhiko. Vo'oku enepone itukápahiko ne xâne yara kúveu mêum ákoti éxa Itukó'oviti ne ngxíxo, mani konokoâti ipíhikopi ra kúveu mêum motovâti ákoyeani yánavakaxapa. ¹¹Itea hane itukóvo ne xâne ngxínopikenoé ákoyea yánavakaxapa, enepone koyúhote ítúkeovo po'ínu úti ya xoko Jesus, itea kóyeane váherexea kixoku ítúkeovo. Énomone ne kapíneti ákoti itukapu koati múxone, koáne ne ixómoti ipupákino isóneuh kahalá'ayea enó'iyeya tiúketina. Énomonemaka ne xâne kuvóvoti sánduhiko, koáne ne váherexokenati yuhó'ino po'ínu xâne, koánemaka ne kohíhikenati, yóko'omaka ne ómevoti. Xâne koetíneye kixoku ítúkeovo koyúhote hókea Jesus, muhíkova íniki hako kalihú'ina.

¹²Hainá'ikopo xâne ákoti itukapu po'ínu úti xoko Jesus ngónoko énjokea ítúkeovo pahukóvoti koane nzayá'ikea. Itea enepone po'ínu úti xoko Jesus, hainápo koati konokoâti yéxoki ítúkeovo pahukóvoti koane seyá'iki.

¹³Kene enepone xâne ákoti itukapu po'ínu úti xoko Vúnae, Itukó'ovitimo exôa kíxoaku nê'e. Képuhikapaikoponoe ya xepákuke ne vaheréxote ítuke.

Nókone kó'iyea apê évotikoko ke ne kutípotihiko Jesus

6 ¹Enepo apê yévatikoko ke, ákonoemea tíyapana yómikoko yuhoíkovokutike nonékuke xâne ákoti asasá'i ítuke nonékuke Itukó'oviti? Na koeti ákoino yámanoe nonékuke po'ínu úti, kasása'iupo Itukó'oviti, motovâti enékeokono? ²Ákoikopo yéxanoe ítúkeovomo úti, uti kasása'iupo Itukó'oviti yuhoíkopamo ne xanéhiko yara kúveu mêum vo'oku kixoku ítúkeovo? Koeku ítúkeovomo énomone yíhoikopo, na kíxeaye ákoyea yéxanoe kíxeaku ne kalíhuti koekúti xepákuke? ³Ákoikopomaka yéxa ítúkeovo utímaka yuhoíkopamo ne ánjuhiko íhae vanúke, enepohikone ovóxe Itukó'oviti, vo'oku kixoku ítúkeovohiko? Ínapomo hako yexoânoe kíxeaku kíkexuxi ne kálíhunoe koekúti hiko kuteâti tokópone úti itukovo káxe. ⁴Itea enepo apê koekúti kuteâti, hane iyénoanoe xoko xâne ákoti itukapu xanena Itukó'oviti, enepohikone ákoti yána êgerejake. ⁵Ákoikopo ápahuina xâne ko'isónéuti xepákukenoe motovâti enékeopinoe, ítínoe kutípoti Jesus? Metókeanoe enepo kateyákapi ra yúnzo! ⁶Ya koêkuni yómi ne koekúti xapa xanena Itukó'oviti ya êgerejake, ponó kixékokonoe yuhoíkovokutike enepo apê kixékokoku, yomokókoti nonékuke xâne ákoti akutipo Itukó'oviti.

⁷Póhutine ápeyea kixékokokunoe, iyúseo ápeyeako hána'iti nêkone ikéneke Jesus. Mani unatíne sikovó kél'iyi apê vahe réxinopiti ítuke. Manímaka unatíne yévakivo vo'ókuke. ⁸Itea ya koêkuni kél'iyineye, ainovó koe ítínoe vahe réxinoa ítuke ne po'i xâne. Ainovó koe ítínoemaka koesáyu'ixi koeku po'ínu xâne. Yoko inípono ítúkeovo koati pe'ínuhiko xoko Jesus ne kíxeneye. ⁹Ákoikopomea yéxa ákoyeamo yanapa natíxokuke Itukó'oviti vanúkeke ne xâne vahe réxoti ítuke? Hákonoe yaupú'ikopovo yarâ'a, vo'oku ákomo pihápaya ne xâne koesáyu'ixoti kixoku ítúkeovo, kapíneti ákoti itukapu koati múxone, koánemaka ne xâne kuvóvoti sánduhiko. Áko'omakamoya ne xâne aupú'ikoti múxone, kapíneti múxone po'i xâne. Kúteanemaka koêku ne hóyeno senoxóvoti, koánemaka ne hóyeno ikoyénoxovoti po'ínu hóyeno. ¹⁰Áko'omakamoya ne ómevotihiko yoko xâne ipupákinoti isóneu kahá'ayea enó'iyea tiúketina, koane kohíhikenati. Kúteanemaka koeku xâne yómoti váherexino emó'u po'ínuhiko xâne, yoko xâne yómoti hú'uxea ítukevo po'i xâne. Ákomo yanápahiko natíxokuke Itukó'oviti vanúkeke kuteâti nê'e. ¹¹Yoko ápe nóvo koetíneye kixoku ítúkeovo xepákuke. Itea kó'oyene, ítínoe kasasá'iuti, ítínoemaka haxakínovoti Itukó'oviti ítúkeovo xanéna, koane penópovone nonékuke Itukó'oviti vo'oku ítukeinoví Vúnae Jesus Kristu koánemaka ne Sasá'iti Omíxone Itukó'oviti.

Iháyu'ikeokonoke Itukó'oviti ra koxe'u úti

¹²Koêkuti íninjone unátíyeya indúkea, motóva indúkea. Kaná'uti nê'e, itea haina uhá koeti koekúti porexó'ovi unako koeku úti. Kaná'uti motó'iyeeva

indúkea koêkuti íninjone unáko indúkea, itea kóyeane ngóhiyanayeovo, mará'inamo áyanzikapa indúkea, hákonemo indôa nguríkea. ¹³Enepone nikokónoti, ápeino vo'oku íhaku nika úti. Kene enepone íhaku nika úti, ápeinomaka vo'oku nikokónoti. Itea apêtimo hunókoku nê'e, vo'oku koêkutimo káxe, uke'éxoatimo Itukó'oviti ne koekútihiho kuteâti. Itea p'íiti koêku ne muyo úti. Haina apeínoti kapinehí kíxea úti ákoti itukapu koati múxone úti, itea hane ápeino itúkeovo iháyu'ikovo Vúnae, yoko ovo'ó kó'iyevimaka Vúnae. ¹⁴Itukó'oviti, enepone koexépukopati ne Vúnae Jesus ukópea xapa ivokóvoti, koexépukopatimakamo ra koxe'u úti ya xunákoke.

¹⁵Ákoikopo yéxa itúkeovo ítuke Kristu ne miúyo? Maní'ikopomea motovâti iyóneam ne ítuke Kristu xoko senohí koêti, mborexoâti ikó'itukexea senohí koêti? Ako kalíhuina! ¹⁶Ákoikopomaka yéxa itúkeovo póhutipone mýyo ne hóyeno xoko mohíti sêno enepo yuhó'ixoa? Koati kaná'uti kó'iyeaneye, vo'oku hara kôe emo'u Itukó'oviti: “Póhutipone mýyo ne pi'âti” kôe. ¹⁷Kene koêkuti kuri'ókovoti Vúnae Jesus, koati póhutiponemaka xokóyoke.

¹⁸Yahíkuxipa ne pahunévoti kuteâti nê'e, enepone ákoyea sayá'ikapeapa xâne ne úhepune mýyo vo'oku ixómoyea kaha'a sêno. Vo'oku uhá koeti koêkuti po'i kó'iyevovoku pahúnevo xâne, haina muyókuke itúkeokono ne pahúnevo. Itea enepone xâne ákoti sayá'ikapeapa itúkea kuteâti, koati muyóne itúkino váhere. ¹⁹Ákoikopomaka yéxa koeku miúyo itúkeovo óvoku ne Sasá'iti Omíxone Itukó'oviti, enepone ovo'ó koépitinoe, páhoenopimaka Itukó'oviti? Hainá'iko itínoe exópo koêku, itea énomone exo kêku. ²⁰Vo'oku kohépiti ne yésa'i pôreupo Jesus. Yusikóneikopo itúkeovo iháyu'ikovo Itukó'oviti ne miúyo.

Yuhó'inoa Poúlu ne íhae Koríntu vo'oku kazaméntu

7 ¹Kuteâti neko yépe monukenoe yítoeke, hara koe inzóneunoa: Enepone ákoyea okóyeno ne hóyeno, únati nê'e, haina váhere. ²Itea vo'oku ú'uso kóyeyea ákoyea sayá'ikapeapa xâne ne úhepune mýyo vo'oku ixómoyea kaha'a sêno, unatíne ápeyeya koati yêno ne póhutihiko hóyeno koánemaka îma ne póhutihiko sêno. ³Enepone koyénoti, ako yusíka ákoyea itúkina úhepune mýyo ne yêno, vo'oku koati ko'ímmainokene ne sêno. Koánemaka ne sêno, ákomaka yusíka ákoyea itúkina úhepune mýyo ne îma. ⁴Vo'oku enepone ko'ímati, ako yusíka poéhayeane akahá'a, ina itukína âha ne îma, itea kahá'ayea îma exoâmaka. Kúteanemaka koêku xoko hóyeno apêti yêno, haina poéhayeane akahá'a exôa, itea kahá'ayea yêno exoâmaka. ⁵Hako kema'âyikokoa nê'e, poéhane itukapu kutikokó koinoâti iséneu ákoyea itíka ya kúveu ye'á koeti káxe, vo'oku kehá'ayi yíxivoxo itíki orásaum, itínoe pi'âti. Itea hákomaka yupihovó kixeánoe kéxu'ikenexi, mará'inamo hixápapi Satánae, enepo hako'óne itêa ne ákoyeanoe itíka.

⁶Enepora yúnzo, pohúneti enjókopitinoe inzóneunoa, kene haina páhoenopi Itukó'oviti ké'iyineye. ⁷Ya inzóneunoake, mani únateoxo akutêa ngoêku ákoyea yênom ne uhá koeti hóyeno. Itea anêko kíxoaku

Itukó'oviti ne póhutihiko xâne. Yoko ako akútikoko koeku uhá koeti xâne. Pó'iti koeku po'ínuhiko koánemaka po'ínuhiko.

⁸Kene ya xoko ávoti múxone yoko xoko ivokóvoti múxone, íninja unátiyea kóyeyane kuteâti ngoêku. ⁹Itea enepo hakó'o itoâhiko, unatíne opósikea múxone yaneko ixómoyea kóxuna'ixovo ítukeovo itoâti.

¹⁰Kene xoko apêtine múxone, anéye páhoenoa Vúnae itúkea, kene haina pohúneti inzóneunoa. Énomone ne ákoyea yusíka kuríkea íma ne ko'ímatine. ¹¹Itea itukovo kurikoâtine, konókoti póhuxeovo ákoti oko'ímapo, áko'o aúkopeovo xoko íma. Kúteanemaka koêku ne hóyeno koyénoti, ako yusíka kuríkea yêno.

¹²Kene ya xoko po'ínuhiko, ako yuho Vúnae Jesus vo'ókuke, itea hara kôe inzóneunoa: Enepone po'ínu úti xoko Jesus apêti yêno ákoti akutipo Jesus, ako yusíka kuríkea itukapu úhepeti isóneu yêno óvoheixea xokóyoke. ¹³Kene ne sêno apêti íma ákoti akutipo Jesus, ákomaka yusíka kuríkea, koeku úhepeyema isóneu íma óvoheixea xokóyoke. ¹⁴Vo'oku xoko sêno kutípotine Jesus apêti íma ávoti háka Jesus, haina koekúti ákoti asasá'i xoko Itukó'oviti ne itúkeovo komuxónkokoti, ínapo okonóko kotóhineopea itúkeovo komuxónkokoti. Koati sasá'iti, vo'ókuke ne yêno kutípoti Jesus. Kúteanemaka koêku xoko hóyeno kutípotine Jesus apêti yêno ávoti háka Jesus, kóyeyane itúkeovo sasá'iti xoko Itukó'oviti ne itúkeovo komuxónkokoti, vo'ókuke ne hóyeno kutípoti Jesus. Enepo hákoti koen'éye, ákoni asasá'i ne xi'íxaxapa, itínoe apêti múxone ávoti háka Vúnae. Itea koati kaná'uti itúkeovo ainóvoti sasá'iti ne xi'íxaxapa. ¹⁵Kene xâne ákoti akutipo Jesus, enepo hákoti kahâ'a óvoheixea xoko múxone kutípoti Jesus, unatíne pihópea. Koen'éye, ákone okónokoa po'ínu úti xoko Jesus, áko'o mokexa úti ísu'okeovoiko múxone, vo'oku iháxikinopikenenoe Itukó'oviti héki, kaha'aínopiti yóvoheixi kásatike isoneúti. ¹⁶Vo'oku ako yéxa, itínoe sêno, ítimo ne íme hokópea Jesus enepo yakamá'a óvoheixea xikóyoke. Kúteanemaka koêku itínoe hóyeno, ako yéxa ítimo ne yíno hokópea enepo yakamá'a óvoheixea xikóyoke.

¹⁷Enepone póneake Itukó'oviti kó'iyema ne póhutihiko xâne inâ ihaxíkoa hokópea, énomoikone ákoeneye péhutinôe. Koati énomone koéneye mbáhoeno xanéhiko ya uhá koeti koékuti imokóvokuti yónongu. ¹⁸Enepo áva xâne xepákuke sirkunsidá koetíne tumúneke iháxikea Itukó'oviti, hako yonôa isóneu ípokeovo, únatine kuteâti kóyeku. Kúteanemaka koêku enepo áva xâne ákoti sirkunsidá akôe tumúneke iháxikea Itukó'oviti, únatine kuteâti kóyeku. Hako yonôa isóneu. ¹⁹Vo'oku enepone sirkunsidá kó'iyema xâne, koáne ne ákoyea sirkunsidá ákoe, ako itópoinovike nê'e. Itea hane konokóvoxo xoko úti vitúkea páhoenoví Itukó'oviti. ²⁰Póhutihiko xâne, ákoyeneye kuteâti koêku inâ ihaxíkoa Itukó'oviti hokópea. ²¹Itukovo iti akaúti inâ ihaxíkopi Itukó'oviti, hako yonôa iséneu vo'ókuke. Itea imihé'aka yoxéne ítivoa ne itíkivo akaúti, únatimakaya. ²²Vo'oku enepone akaúti iháxiu Vúnae hokópea, koati itóvotine xoko Vúnae, koeku ákoyeyane itúkapu

ákau váhere kixovókuti. Kene enepone xâne ákoti itukapu akaúti inâ ihaxíkoa Vúnae hokópea, ovóxepono Kristu kó'oyene. ²³Koati porexópovotine ésa'i ne keítivokononoe. Ákoikopo yusíka itúkeovo xâne yara kúveu mêum exêa kêku, kutí'iyea itínoe ákau. ²⁴Itínoe mbo'ínu xoko Jesus, kuteâti kêku inâ ihaxíkopi Itukó'oviti hekópi péhutinoe, énomoikone yákoene ikéneke Itukó'oviti.

Enékeekonoke ne ávoti múxone vo'oku kaxena kotíveti koekúti

²⁵Kene ne ârunoehiko ávoti îma, ako yuho Vúnae Jesus koêku râ'a ya páhoenovike vitúkea. Itea ngoyuhó'inopeatinoe inzóneunoa, undi xâne motokeâti kúveovokono isóneunoa vo'oku seánakonu Itukó'oviti. ²⁶Íninjoa unátiyeya kóyeyekone kóyeku ne xâne, ákoti apasíka múxone, vo'oku tiú'itine ra káxehiko símokune ûti. ²⁷Itea itukapu apêtine yîno, hako kirikôa. Kene itukapu ávoti yîno, hako yoposíko kéyenoyi. ²⁸Itea enepo yokoyéno, ákomo pehúkapu. Koánemaka ne ârunoe, enepo oko'íma, ákomo pahúkapu. Itea kóyeanemo enó'iyea tiú'iti koekúti vékokuhiko ne komuxónekokoti. Yoko mani anjá'inopinoo ákoyea vika tiú'itike koekúti.

²⁹Koati ngxópitinoe, itínoe mbo'ínu xoko Vúnae, ákoyeanemo axú'ina kaxena ûti motó'iyevokaku ko'ítukeino uti Vúnae. Konókotikopo kutí kó'iyeya ákoti múxone ne apêti yêno, motovâti yuíxeovo ítukexeake Vúnae. ³⁰Hainámaka póhutinehiko nê'e ngíxo, itea kúteanemaka ne ikaxú'itihiko okóvo. Hako itukovo énomone yónoheixo isóneu, itea kutí ákoe ákoti aikáxu'i okóvo. Koánemaka ne xâne elóketi okóvo, hako itukovo énomone yónoheixo isóneu, itea kutí ákoemaka ákotihiko aelóke okóvo. Kúteanemaka ne vanéxotihiko, hako itukovo váneu yónoheixo okóvo, itea kutí ákoe ákotihiko váneu. ³¹Epó'oxo koêkuti kixovókuti yara kúveu mêum vikó'itukeu, hako itukóvo énomone yuíxovoxo ûti, itea kutí ákoe ákotimaka itukapu vikó'itukeu. Vo'oku enepora uhá koeti noíxone ûti yara kúveu mêum, ákomo oríko uké'eyea.

³²Yoko enepora koâti anjá'inopinoo, énomone ákoyea ixomo ipúpakina iséneu ne kixovókuti yara kúveu mêum. Vo'oku enepone ákoti múxone, koati apêti oxéne yuíxovoxo ítukexeake Vúnae, oposí'ixoti kixoku ikó'elokexea okovo Vúnae. ³³Itea enepone apêtine yêno, koati kixovókuti yara kúveu mêum yónoheixo isóneu, koeku opósi'ixea kixoku ikó'elokexea okovo yêno. ³⁴Énomone pi'á kó'ino yónoheixoku isóneu.

Kene ne sêno ivokóvoti îma, koánemaka ne ávoti îma, koati motovâti yuíxeovo ítukexeake Vúnae, koane kurí'okeovo Vúnae, herú kixoti isóneu koane múyo itúkeovo sasá'iti ikó'itukeu Vúnae. Itea enepone ko'ímati, koati kixovókuti yara kúveu mêum yónoheixo isóneu, vo'oku opósi'ixea ikó'elokexea okovo îma.

³⁵Ngixínopikeneeye, ngahá'ati nzuvó'oxeopinoe, kene haina ngahá'ati indópeopi. Koati ngaha'aínopiti péni kixeku itíkivo. Ngahá'amaka nzuvó'oxeopinoe itíkivo haxakínovoti ítuke Vúnae, ákoti po'i yónoku iséneu.

³⁶Kene ne homoêhou kahá'ati itúkea kuteâti ne yunzómeku, itea puvâti itúkeovo tiú'itino noívana enepo hákoti okoyénoa, vo'oku pihínone anú'ukea kuteâti yé'akeye xoénaena mani ko'ímaya, epó'oxo inixâ homoêhou kónokea koévesekea neko inúxoti yuhó'ino, koane akahá'aiko kóyenoyea, ako koêku. Motóva kóyenoyea, ákomo pahúkapu. ³⁷Itea enepo áva isóneuke homoêhou ákoyeanemo okóyenoa, epó'oxo inixâ ákoyea okónokoa ómea tumúne ne kóyenoyea, koane inixâmaka íteamo ne kixóvoku póhuxeovo, ako yuvâti koeku usó'iyeeane isóneu ákoyeanemo okóyenoa ne noívana. Únatimo akoéneye. ³⁸Yane, enepone koyenoâti ne noívana, únati koêku. Kene ne ákotine okoyénoa, unatíneo koêku.^a

³⁹Enepe sêno ko'ímati, koeku ávoyea ivákapu íma, ako yusíka kuríkea íma. Itea enepo ivakápu íma, motóva ko'ímapea po'i hóyeno, koêkuti áha. Itea konókoti itúkeovo hóyeno kutípoti Vúnae. ⁴⁰Yoko kóyeane inzóneunoa unátiyeamo koêku enepo hákoti ko'imápo. Koati ininjoâtimaka itúkeovo xokóyoke ne Sasá'iti Omíxone Itukó'oviti úkea inzóneunoa ra koekúti.

Koeku nikokónoti ikó'iparaxokonoke sánduhiko

8 ¹Kó'oyene, ngoyuhoâtiko koêku ne nikokónoti ikó'iparaxokonoke sánduhiko. Uhá koeti úti, vínixoa póneovo visóneunoa ne koekúti. Itea enepone vínixea póneovo visóneunoa, kapáyasokeovo xâne poréxo. Itea enepone kixoku vitúkeovo poréxoti po'ínuhiko xâne kóukoponeovo ikéneke Itukó'oviti, énomone ne ákoyea omótovokoko vokóvo. ²Enepe xâne inixoâti póneovo isóneunoa ne kixovókuti, kóyeane ákoyea itápana heú kíxea éxea ne mani nókone éxea. ³Kene ne xâne ákoti omotóvo okovo Itukó'oviti, koati éxone Itukó'oviti nê'e.

⁴Kó'oyene, kuteâti ne nikokónoti ikó'iparaxokonoke sánduhiko, véxoa ákoyea itúkapu kaná'uti kixovókuti ne sándu. Vo'oku poéhaxo ne koati kaná'uti Itukó'oviti, ako po'ínu. ⁵Kaná'uti ápeyeya kixovókuti ya vanúkeke koánemaka ya poké'eke, hókone xanéhiko, ákoti itukápa ne kaná'uti Itukó'oviti, vo'oku êno hokonéti kuteâti. Yoko enepohikone xâne hokoâti, "Itukó'oviti" kíxoa íhaxea, koane "Únae" kíxoamaka. ⁶Itea xoko úti, poéhaxo ne koati kaná'uti Itukó'oviti, Há'a úti, enepone pahukoâti apé

^a7.36-38 Ako iyúsea koêku ya emó'uke ngerêku itúkeovo so'íxoti noívuna ne árunoe, áko'o há'a ne árunoe. Áfnovo motovâti. Énomone ákoino akútikoko koêku ya uhá koeti Bíbilea. Ya po'íke Bíbilea hara kôe: "³⁶Itea itukovo apêti inixoâti ákoyeamo únati xoko ihíne anú'ukea yé'akeye xoénaena mani ko'ímape, yoko inixâ há'a ra árunoe kahá'ayea ko'ímaya, motóva ikó'imaxe akahá'a. Haina pahukóvoti oko'íma. ³⁷Itea itukovo itoâti ihíne ákoyea okó'ima, epó'oxo enepo hákoti úsotine yuhôti ikó'imaxeokonono, koane atiú'ixo isóneu há'a unátiyeya kíxeaneye ákoyea iká'imaxa ihíne, koati únati koêku akoéneye ítuke. ³⁸Yanê'e, enepone iko'imaxoti ihíne, únati ítuke. Kene enepone ákoti ika'ímaya, unatíneo ítuke."

kó'iyea ne uhá koeti koekúti. Kene vitúkeovo ovóxe, énomone vápeino. Poéhaxomaka ne Vúnae, enepone Jesus Kristu. Énomone évekoa Itukó'oviti itúkea uhá koeti koekúti. Énomonemaka úkea vápeyea.

⁷Itea ako uhá ákoe xâne exoâti ra kixovókuti véxone. Vo'oku ápe xâne ênoti xoénae kúveovo sánduhiko. Yoko enepone nikokónoti ikó'iparaxokonoke sándu, tukú koeti kó'oyene enepo nikôa, kutí kó'inoa pahukóvoti, vo'oku itúkeovo ikó'iparaxokonoke sándu inúxotike. Yane vo'oku ákoyea itápana pónea isóneunoa, koati eópoti itúkeovo pahukóvoti enepo nikôa, koane ikópiti'ikopovo vo'ókuke. ⁸Itea haina nikokónoti exoâmo sasá'iyea úti nonékuke Itukó'oviti. Koêkuti koêku, enepo nikâ úti, áko'o ákoyea níka úti, ako vévakapu, koane ákomaka itópoinovike nonékuke Itukó'oviti.

⁹Itea enepone ínixinoe motó'iyeeva níkeokono uhá koeti koekúti, koane enepone níki koekúti kuteâti, neíxapu mará'inamo késayu'ixa po'ínu xâne ákoti akoéneye isóneunoa, enepone aínati kóhiyanavo. ¹⁰Vo'oku itukovo apêti xâne noixópiti imókovokuke xâne kuvóvoti sánduhiko, keha'íneatihiko níki, iti ko'éxoneti ya ítuकेके Itukó'oviti, ákoikopomo ínixa po'ínuhiko xâne aínati kóhiyanavo yusíkeamaka níkea nikokónoti kuteâti, upánini ínixea ya isóneuke ákoyea aínati? ¹¹Yane enepone itíkivo ko'éxoneti ítuकेके Itukó'oviti, koati énomonemo ikoróko pe'ínu ikéneke Jesus, enepone aínati kóhiyanavo. Yoko koatímaka xâne ivókinovoke Kristu nê'e. ¹²Koeku kó'iyeaneye pehúnevo yokó'okiti isóne ne po'ínu úti aínati kóhiyanavo, koatine Kristu váherexino ítike. ¹³Énomone ngó'ino: Itukápuikopo vo'oku níngea nau hó'openo íngorokino mbo'ínu, ákonemo níngaku nê'e, maka hákone ingorókoa.

Púva itúkeovo avaha xâne íkamone emo'u Itukó'oviti ne Poûlu

9 ¹Koati kaná'uti motó'iyeeva indúkea koekúti íninjone unátiyee, haína? Hainâra koéneye. Kúteanemaka koêku kaná'uyeevo indúkeovo ápostulu, páhoe Vúnae koyúhoyea emó'u xapa xâne. Koane kaná'utimaka noínjea Vúnae Jesus ya ungékuke. Yoko kaná'utimaka itíkivonoe eho ngo'ítukeino Vúnae. ²Yusíkoti ínixa po'ínuhiko xâne ákoyea indúkapu ápostulu, itea koati kaná'uti indúkeova xepákukenoe. Enepone kitípi yúnzo koeku Jesus, koati énomone koyuhónu kaná'uyee indúkeovo ápostulu. ³Énomonemaka indúko yumómbeake ne xâne koemóke'enuti, koyúhoti ákoyea indúkapu ápostulu.

⁴Koati motokeâti ko'íparayea úti nikokónoti yoko vêka, úndi yoko nza'ínehiko, koeku vomínopinoo emo'u Itukó'oviti, haína? Hainâra koéneye. ⁵Koatímaka motokeâti ápeyee sêno kutípoti Jesus, yeno úti, motovâtimaka xané'iyeevi koêkuti vónoku, kuteâti koeku Péturu koáne ne po'íhiko ápostulu yoko ámeno Jesus. ⁶Áko'o, xapákuke ne koyúhotihiko emo'u Itukó'oviti, kutí'inopinoo poéhanemea úndi yoko Mbaranâbe konokô ko'ítukeyee vitúkea ésa'i nika úti? Ako kalíhuina kó'iyeaneye.

7Noixó íxea húndaruhiko. Ako ápahuina húndaru pahoéti xapa isukókoti konókoti poréxopea ésa'i nókone. Kúteanemaka koêku ne xâne nôti. Ako ápahuina xâne noti xuve úva, ákoti nikâ ne ha'i nóne. Ákomaka ápahuina xâne apêti óyonone, kuteâti vakána, ákoti arekêa leítana ne óyonone.

8Enepora ínzokoake, pohúnetimea isoneú ngxixone kuteâti kixoku itúkea isóneu ne xanéhiko yara kúveu mêum? áko'o anêkomea yútoe Muíse kuteâti yane Ponóvoti Kixovókuti emó'uke Itukó'oviti. 9Hainâramaka kôe yútoeke Muíse. Énomone ne koêti: “Hako ike'áki pâho ne vûi enepo huva'áxapi ókonuheinopea ne itóvotine ha'i tiríku” kôe. Poéhaneikopomea vûi yóno isóneu Itukó'oviti kó'inokeneye yûho? 10áko'o utímaka kíxo kó'inokeneye ne yutoéti. Koati iyúseoti itúkeovo utímaka kíxo ne yutoéti emó'uke Itukó'oviti. Noixó íxeamaka xâne varereôti poké'exa. Itúkinoake ne itukéti, koati kuxoíxoati ápeyemo êho. Kúteanemaka koêku ne veyoti íhae isáne. Konókoti itúkeovo kuxoâti ápeyemo êho kutí'inoke itukoâti ne itukéti. 11Koeku itúkeovo emo'u Itukó'oviti nô úti xepákukenoe, ákonikopomea omótova kúxea úti keúsokinovi nókone úti? 12Koeku keúsokinoa nókone ne po'ínuhiko koyúhotei emo'u Itukó'oviti simópitinoe, ínapoxo hako motokêa kíxeokononeye úti.

Itea ako vakáha'a vitúkeovo yávahano. Vítóa uhá koêti ne tíú'iti koekúti vékoku úti, kaha'âti úti ákoyea vitápapinoe kítípi ne inámati ihíkavoti vomínopike koyúhotei koeku Kristu. 13Yoko yéxoaneno koêku ne ko'ítuketi sasá'iti ituke Itukó'oviti ya témpuluke, itúkeovo énomonemaka ukínoa námoe. Koáne ne inuxínotihiko itukéti omâti átake ne ikó'iparaxokonoke Itukó'oviti, koati xoko iparáti átake ukínoamaka nîka. 14Kúteanemaka koêku yuho Vúnae vo'ókuke ne koyuhoâti ne inámati ihíkavoti ukeâti xokóyoke. Pahúkoamaka Vúnae itúkeovo vo'oku koyúhoyea emó'u ápeinoa námoe, kóusokovope nókone.

15Itea tukú koeti kó'oyene, upánini motókea ápeyema námoe, undíne ako akahá'a. Yoko haina vo'oku ngahá'ayeane, yundóxinopinoe kó'oyene. Ehá'ani ivóngeo yaneke kó'iyeaneye, vo'oku koati éyenjovope ne ákoyea indúkapu yávahanoe ítukeke Itukó'oviti. 16Enepone ngoyúhoyea ne inámati ihíkavoti koyúhotei koeku Jesus, ako omóndokea inzáyú'ikeokono vo'ókuke. Koáhatei undi pahoéti itúkea ne itukéti. Yane koati ngonokoâti indúkea. Mani mondokéâtimaka imbíhoponeokono eneponi hákoti ngoyuhôa. 17Kene eneponi itukapu ukeâti inzóneuke usó ngóyeyea indúkea ne itukéti kutí'inoke indukoâti, ákoti indukápu pahoéti, hainápo mani motovâti ngúxea ápeyema námoe vo'ókuke. Itea koeku indúkeovo pahoéti, koati apêti nzó'exeokonoke, mbáhoenokono indúkea. 18Koeku kó'iyeaneye, kutimea indúka námoebomo? Hará'a, hána'iti úhepeko inzóneu vo'oku ákoyea énzal'ixeake ngoyúhoyea ne inámati ihíkavoti koyúhotei koeku Jesus, koane ákoyeamaka indúkapu yávahanoe, koeku ákoyea itúkapu itínoe kousókinonoa ne nóngone, upánini mondókeyea ngóusokinokonoa koeku ngoyúhoinopinoe emo'u Itukó'oviti.

19Koeku ákoyea porexónuti námoe, yane índeoivo itúkeovo po'ínuhiko xâne exô ngoêku. Itea kóyeanee indúkeovo ovoxe uhá koeti xâne, motovâti

xu'ínayeaxo xâne índone hokópea Jesus. ²⁰Xapa jûdeuhiko, íngutipasikeova ne kixoku itúkeovo, ngaha'âti índea hokópea Jesus. Kúteanemaka ngoêku xapa xâne yuixóvatihiko hókea ne Ponóvoti Kixovókuti yútoe Muíse, íngutipasikovamaka, motovâti hokópea Jesus vo'ókuke, upánini ákoyea itúkapu xunako Ponóvoti Kixovókuti exô ngoêku. ²¹Kene xapákuke xâne ákoti hakâ ne Ponóvoti Kixovókuti yútoe Muíse, íngutipasikovamaka. Itea haina ngoêti ákoyea ponóvoti kixovókuti nóngone indúkea nonékuke Itukó'oviti. Kóyeane ápeyea vo'ókuke ne páhoenovi Kristu vitúkea, enepone nzókone. Íngutipasikinovake ne xanéhiko, koati ngaha'aínoati hokópea Jesus. ²²Xapákuke kutípoti Jesus aínati kóhiyanavo, po'okoâti itúkeovo pahunévoti ne koekúti kóhiyanavo, ákomaka indúka ne íkutixane pahunévoti, motovâti índea hokópea Kristu. Íngutipasikinovake ne uhá koeti xâne, motovâti ápeyea koítovone Kristu xapákuke, ênjo ya uha-uhá ngíxea íngutipasikeovo kixóvokuhiko xâne.

²³Ngixínovokeneye vo'ókuke ne inámati ihíkavoti koyúhotei koeku Kristu, maka ngaúkapanane xapa xanéhiko ne únatinoe koekúti omínovike. ²⁴Hane ínzokinopeano ra koekúti, kuríkotihiko kaxunákovoti ya xoko ehákovoku enepo ehahíkovone. Yoko yéxoanoe itúkeovo ehahíkovoti ne uhá koêti, itea poéhaxo ne itôti xapákuke. Poéhaxomaka omopâti ne iparáti. Kuteâti kóxunakeovo nekóyohiko, kéxunakapuikopomaka ikéneke Kristu, motovâti itéponi ípera xoko Itukó'oviti. ²⁵Heú koeti kuteâti nekóyohiko ahúkoti éhahikeovo, kóxunakovo itúkea uhá koeti nókone itúkea motovâti itóponea ne iparáti. Yoko koati koekúti ákoti oríko uké'eyea kahá'a itóponeahiko. Itea enepone kóxuna'ixinovo ke úti, koati vo'oku iparáti ákotinemo uké'eyeaku. ²⁶Koeku kó'iyeaneye, ngóxuna'ixovomaka, kuteâti koêku ne ehahíkovoti. Yoko pono-ponó ngoéne xoko nóngone indóponea. Kutí koémaka xapa isukókoti ôvom koeku ixómoyea ngóxuna'ixovo. Yoko haina koxunakovohí ngoêti. Ako angútea xâne ka'apéneti yúkurea isúkeokoko. ²⁷Koati ákoti iyunzixapapu nzayá'ikopeovo. Kutí ngixópovo imbihóponovoti yane yupíheovo ngóxuna'ixeovo indúkea ne itukéti, maka enepo ongoyúhoinoane emo'u Itukó'oviti ne po'ínuhiko xâne, hákone ainovó koe úndi inixókono ákoyea omótokea itúkeovo ovoxe Itukó'oviti.

Vípíkeokonoke kixoku itúkeovo ne izaraelíta yaneko inuxópinoahiko Muíse

10 ¹Itínoe mbo'ínu xoko Jesus, itíkinanoe iséneu kixoku itúkeovohiko ne oxúnoekene iyénonjapa jûdeu yaneko inuxópinoahiko Muíse. Uhá koe inuxópinoahiko kapási, koane uhá koéhikomaka tarú'uxea neko mar iháxoneti Hararáno'evoti. ²Kuteâti koeku ahiúti kó'oyene ya iháke Vúnae, énomonemaka koéneye heú koêti neko voxúnoekene ikéneke Muíse, vo'ókuke ne kapási inuxóinatihiko, koane vo'oku tarú'uxeamaka neko mar. ³Uhá koéhikomaka níkea neko nikokónoti ukeâti vanúke xoko Itukó'oviti. ⁴Uhá koéhikomaka énoyeova neko úne poréxoakehiko Itukó'oviti ukeâti mopóike. Yoko enepone koati kaná'uti úkeaku êka, enepone mopô

kixonéti apêti xapákuke koeku yónea, énomone ne Kristu. ⁵Itea upánini kó'iyeaneye, kóyeane ákoyea axú'ina ínixone Itukó'oviti unátiyea koêku ya xapákuke neko xâne. Énomone ívohikinovo yaneko mêum ákoti apêti.

⁶Enepone koekútihiho, aínovo koati ipíkoviti, kaha'aínoviti ákoyea víyakapa ne váhere kixovókuti kuteâti íyokevohiko. ⁷Hákomaka ikítipasikova ne kixoku itúkeovo yaneko kuvôno sánduhiko, kuteâti koeku koyúhoinovea ya emó'uke Itukó'oviti xoko kó'iyeanu: “Ívátahiko, ina turixóvo níkeahiko koane énoyeovo, ina exepúkohikomaka, koane híyokexea” kôe. ⁸Hákomaka vitukóvo xâne itúkoti váhere úhepune mûyo, kapíneta ákoti itukapu múxone, kuteâti kixóvoku nekóyohiko ívohíkovo vinti trei koeti mili xâne ya póhuti káxe. ⁹Hákomaka ixomo vitúko váhere, voposí'okovoti Itukó'oviti kuteâti kixoku itúkeovo neko xanéhiko mekúke, kutí'inoke koepékokonoti po'ínuhiko yaneko ohonókexoa koéxoe. ¹⁰Hákomaka ixomo kepahákovo kuteâti kixóvokuhiko, kutí'inokemaka koepékexoponoti ovoxé Itukó'oviti ukeâti vanúke.

¹¹Kó'inokeneye ne uhá koeti kixóvokuhiko, motovâti vípíkeokono vo'ókuke. Yutóxinovokemaka emó'uke Itukó'oviti motovâti ákoyea vituka váhere, uti xâne apêti yara káxehiko yé'exeovokune hunókovu ra mêum.

¹²Énomone ngó'ino: Enepone xâne ínixópovoti itúkeovo koati xúnati isóneu ikéneke Vúnae, naíxapu mará'inamo íkarakapu. ¹³Enepone tiú'iti koekúti víkokunoe, koati vékokunemaka ne uhá koeti po'ínuhiko xâne. Itea koati kuvovóneta ne Itukó'oviti, vo'oku ákomo paréxa anú'ukea xináko ne tiú'iti koekúti simópitinoe, itea exókovitinoemo kixeku ítívoa, motovâti terú'uxi.

¹⁴Énomone ngixínopinoe, itínoe ákoti omotóva ongóvo, hako itukóvo sánduhiko kivóvo. ¹⁵Itínoe yónoku ra yúndoe, koati itínoe xâne éxoti ikó'itukexea isóneu. Itíkinaikopo iséneu ra yunzó'inopinoe, motovâti yéxi nékone itíki vo'ókuke. ¹⁶Hane ngíxo: Enepora enovópeti, óvoku ekâti, víkoro'ixinovo Vúnae, puyakóponovoti vokóvo ne ívókinovovi, koati venóyeovoti vo'oku poéhapeane visóneu xoko Kristu ákoti vihaxákea, vo'oku óvokinovovi itína kuruhúke, haína? Hainâra. Kúteanemaka koêku ne pâum, honó'ekue úti, níkínoake úti vo'oku poéhapeane ne visóneu xoko Kristu vo'oku ívókinovovi kuruhúke, haína? Hainâra. ¹⁷Vo'oku poéhayeane ne pâum, uti póhutipone ikéneke Vúnae, kuteâti koeku póhuti koxe'úti, upánini ákoyea yumáxapu úti. Koáhati póhutike koxe'u pâum úkea nika uhá koeti úti.

¹⁸Itíkinaikopo iséneu koêku ne xanena Izarâe: Enepone itúkoti itúke Itukó'oviti, nikoâtimaka ne nau hó'openo ikó'iparaxoke Itukó'oviti ya átake, koati exókovoti itúkeovo póhutine isóneu xoko Itukó'oviti, únae ne áta. Énomone koéneye koeku níkea, haína? Hainâra koéneye. ¹⁹Koeku ngíxeopinoye, pé'okoamea ngahá'ayea ngíxeopinoye itúkeovo sasá'iti kixovókuti ne sánduhiko, áko'o itúkeovo sasá'iti ne ikó'iparaxokonoke sándu. Itea ako

kalfhuina kó'iyeaneye ânja! ²⁰Koati ngixópitinoe itúkeovo ndémoniuhiko yúho'ixo ne xanéhiko enepo omíno sánduhiko ikó'iparaxoake. Kene haina Itukó'oviti omínoahiko. Yoko ako angáha'ainopinoe yího'ixi ndémoniuhiko. ²¹Na kíxoaye motó'iyeeva yénoyivoa ne ekâti, puyákoponeovoke yokóvo ne ivókinovovi Vúnae, koêkumaka yího'ixinoe kixovókuti ítuke ndémoniuhiko? Námaka kíxeaye motó'iyeeva níki ne pâum, puyákoponeovake yokóvo ne ítukeinovivi Vúnae, koêkumaka yího'ixi kixovókuti ítuke ndémoniuhiko? ²²áko'o, kixínoakeneye úti kaha'átimea úti vopósi'okeovo Vúnae, po'okoâtimea úti vitúkeovo xúnati ya Vúnae, po'okoâtimaka úti víteovamo ne mani ipíhóponeovi.

Konókoti kóhiyanayeokoko úti

²³Koêkuti íninjone unátiyea indúkea, motóva indúkea. Kaná'uti nê'e, itea haina uhá koeti koekúti porexó'oviti unako koeku úti. Koêkuti íninjone unátiyea, kaná'uti motó'iyeeva indúkea, itea haina uhá koeti koekúti poréxeovimaka koukóponeovo úti ikéneke Kristu. ²⁴Hako poehâne unako kêku yíxovo, itea konókoti kehá'ainoamaka unako koeku ne po'ínuhiko xâne.

²⁵Koêkuti nikokónoti yâha víyi ya xapa kavánetihiko, motóva níkinoe. Ako apásika yépemo'iki úkeaku, pivoâti itúkeovo koekúti kéliyanavoke ákoyea omótova níkeokono. ²⁶Vo'oku enepora kúveu mêum yoko uhá koeti ovâti, koati ítuke Vúnae.

²⁷Enepo áva xâne ákoti itukapu po'ínu úti xoko Jesus itáfkopitinoe óvokuke níképoni, píhe yakaha'a píhi, koane níkea koêkuti yâha níki yane nikokónoti apêti mesákuke. Ako apásika yépemi úkeaku, pivoâti itúkeovo kéliyanavoke ákoyea omótova níkeokono. ²⁸Itea enepo áva kixópiti: “Íparaxokonoke sándu râ'a” kixópiti, hako níkeá, kehíyánati ne xâne etó'okopiti, koánemaka vo'ókuke ne isoneúti ákoyea yusíka níkeokono. ²⁹Yoko enepone isoneúti ngíxone ákoyea omótova níkeokono, haina iséneunoano, itea koati vo'oku kó'iyeaneye isóneunoa po'i xâne.

Ínameamo akôe iséneu: “Itea namea koeti kónokino itúkeovo isóneunoa po'ínu xâne exôa yusíkea níngea, áko'o ákoyea nínga? ³⁰Vo'oku itukovo ingoró'ixinovatine Itukó'oviti ne nikokónoti, yusíkoikopo váherexinonu isóneu po'ínu xâne koeku íngoro'ixinovane Itukó'oviti?” ketímeamo.

³¹Itea hara ngixópinoe: Uhá koeti ítikevo, itukovo níkéti, áko'o yorékoti, áko'o itukovo ítúkoti koêkuti po'ínu koekúti, itika uhá koêti motovâti iháyu'ikeokono Itukó'oviti. ³²Hako itukovo úti íkorokinovo ne po'ínu xâne pahunévotike, yusíkoti ítúkeovo júdeuhiko, áko'o xâne ákoti itukapu júdeu, áko'o po'ínu úti xoko Kristu ho'uxínovoti ítuke Vúnae. ³³Yoko ya uhá koeti koekúti, énomone ngixóvoneye ngóxuna'ixeovo xapa uhá koeti xâne, ombosíkoti ákoyea ítúkapu unako ngoêku yuínjovo, itea ítúkeovo unako koeku po'ínuhiko xâne ombósiko, motovâti enó'iyea xâne yonópotimo xoko Itukó'oviti vo'ókuke.

11 ¹Hara hekánoe ngixoku indúkeovo kuteâtimaka nzókea kixoku ítúkeovo ne Kristu.

Kixó'ekone itúkea ramánone ne senóhiko imokóvokutike ya Koríntu

²Inzáyu'ikopinoo vo'oku kóyekuneyea puyákeovonu yokóvo, koane koati hekoâtinoe ne ihíkauvoti ínzikaxeopike, enepone hókonemaka ne kutípotihiko Kristu inúxoti ya utíke. ³Itea anéyeiko po'í anjá'inopi yéxi, harâ'a: Kristu itukovo tuti uhá koeti hóyeno. Kene ne hóyeno, sêno itukoa tûti. Kene Kristu, Itukó'oviti kotûti.

⁴Yanê'e, enepo apê hóyeno ramanoné koêti itúkea orásaum, áko'o koyúhoyea emo'u Itukó'oviti ya imokóvokutike, koati koteyókopovone vo'ókuke ne ramánone. ⁵Kene enepo apê sêno ákoti ramánone koeku itúkea orásaum, itukovo koeku koyúhoyea emo'u Itukó'oviti imokóvokutike, koati koteyókopovone vo'oku ákoyea ramánone. Vo'oku sêno ákoti ramánone, mani kúteane koêku eneponi kaulálapu'ikapu. ⁶Yanê'e, yusikóneikopo ulalapu'í kó'iyea, enepo hákoti kahâ'a itúkea ramánone. Itea enepo teiná ne vaté'ikeovo áko'o koúlalapu'ikopeovo, yusikóne itúkea ramánone. ⁷Kene ne hóyenhiko, ako omótova ápeyee ramánone, vo'oku kuteâti koeku Itukó'oviti itúkeovo hána'iti ihayú'iuuti apêti xunáko oúkeke uhá koêti, énomonemaka koéneye pónekonoke ne hóyenhiko kó'iyea yara kúveu mêum. Kene ne sêno, pó'iti pónekonoke kó'iyea ya hóyeno, yoko koati iháyu'ikinokonoke koeku kó'iyeaneye. ⁸Hainámaka xoko sêno úkea neko inúxoti hóyeno, itea enepone inúxoti sêno, koati úkeakune xoko hóyeno. ⁹Epó'oxo hainámaka sêno itúkinokono ne hóyeno, itea koati vo'oku hóyeno itúkinokono ne sêno. ¹⁰Epó'oxo vo'oku ánjuhiko ivokó'oixoviti, ene kónokinomaka ikó'itukexea ramánone ne sêno, éxokovope itúkeovo hóyeno itúko tûti. ¹¹Itea ya ikéneke Vúnae, kutíkokone kónokeokoko ne hóyeno yoko sêno. ¹²Iyúseo kó'iyeaneye, vo'oku kuteâti koeku itúkeovo xoko hóyeno úkea neko inúxoti sêno, aínopovone ipuhíkeati xoko sêno ne hóyeno. Kene turi uhá koêti, énomone Itukó'oviti.

¹³Yapásika yéxi póneovoku ra koekúti. Ya iséneunoake, ako yuvâti enepo itúka orásaum ne senóhiko imokóvokutike ákoti ramánone? ¹⁴Noixó íxea rá'a: Koati inixoâti uhá koeti xâne poé'ayea koêku ne hóyeno úhiti tûti. ¹⁵Itea koati iháyu'ikeokonoke sêno ne hána'iyea tûti. Poréxinokonoake sêno kó'iyeaneye ne híyeu tûti, koati kutí koeti ramápu'í uso'íyeatinekene. ¹⁶Enepo áva okopâti ra yûnzo, koati ngxópitinoe ákoyea itúkapu kixóvoku ne senóhiko xapákuke úti ákoyea ituka ramánone. Kúteanemaka koêku xapákuke po'ínu úti ho'uxínovoti ítuke Itukó'oviti ya uhá koeti po'ínuhiko êgereja.

Koêku ne puyákoponeovake vokóvo ne ivókinovovi Jesus

¹⁷Kuteâti koêku ra ânja yundóxinopinoo kó'oyene, ako inzáyu'ikapinoo vo'oku enepo he'uxínovo ítuke Itukó'oviti, mani únati pôreu, itea ainovó koe énomone kutí'inoke kuri'úxovoti pahunévoti xepákukenoe. ¹⁸Inúxotike, eyéngxopinoo ápeyee haxakeôvokokoti xepákuke enepo he'uxínovo ítuke

Itukó'oviti. Koane ngahá'atine ngutípea. ¹⁹Yoko kutí koe ákoti po'i oxéne yéxinoe itukóvotiye xâne xepákuke motovâti inúxinopi ákoti itukapu ya héxakexivokoko. ²⁰Enepo he'uxínovanoe ne pâum yoko ekâti, haina ivókinovovi Vúnae he'úxinovo puyákoponeovo yokóvo. ²¹Vo'oku inuxó koe níki péhutinoe, ákoti kixakáka. Yanê'e, ápe xâne xepákuke ákoti koati níkea, kene po'ínuhiko kohíhine. ²²Inípono, kutí kénoe ákoti yóvoku motovâti énomoyeane yóvo níki koane yénoyivo! Áko'o, inuxó ké'inoke níki ákoti kixakákanoe, pivôátimea ne pe'ínuhiko hokotímaka ítuke Itukó'oviti, áko'o keha'átimea kéteyoki ne ákoti apeínoati. Yara kuteâti kixeku ítíkivo, metókeanoe inzáyuikeopi? Ako kalíhuina!

²³Enepone ihíkauvoti námoem xoko Vúnae, énomonemaka ínzikaxopinoe yanekôyo. Harâ'a: Yaneko yóti tumúneke kurí'okeekonone xanéhiko puvâti veyo pâum ne Vúnae Jesus, ²⁴ina ikoró'ixovo xoko Itukó'oviti, yane ina hono'ékexoa koane kó'iyea:

—Enepora pâum, múyom kixó'eko, ésa'imo ngoíteovopinoe. Yákoyenenoeye níki puyakóponovati yokóvo ne índukeinopinoe —koéne.

²⁵Uke'éxone njántaxeahiko, ina namukôa Jesus ne enovópeti kuteâtímaka kíxoaku ne pâum, koánemaka kó'iyea:

—Enepora ekâti yara enovópetike, hane kixó'eko inámati kixovókuti ítukeino xâne ne Itukó'oviti vo'oku óvokinovopinoe indína. Yákoyenenoeye yénoyivoa puyákoponeovake yokóvo ne índukeinopinoe uhá koetímo yénoyivoaku —koéne.

²⁶Vo'oku uhá koetímo níkikunoe ra pâum koane yénoyivoakumo ra ekâti, yexókoati kaná'uko ivókinovovi Vúnae tukú koetímo aukápapu.

²⁷Énomone motókeino ipíhoponeokono ne xâne níko kixoâti ne pâum, koane enovó kixoâti ne ekâti ákoti teyâ kixó'ekone ne muyo Jesus, koánemaka ne ítína yaneko ivokínovovi. ²⁸Konókotikopo komómopeovo ne póhutihiko xâne tumúneke níkea ne pâum koane énoyeova ne ekâti. ²⁹Vo'oku koékuti xâne níko kixoâti ne pâum, koane enovó kixoâti ne ekâti ákoti teyâ ne kixó'ekone, koati epemópinovoti ipíhoponeokonomo. ³⁰Énomone enó'ino xâne ákoti okomoíke koane ka'arínetai xepákukeno. Kene po'ínuhiko, ívohikovone vo'ókuke. ³¹Vo'oku eneponi vokomómopovo inúxotike, noíxoti uti ápeyea pahúnevo úti motovâti kóyuseopeovo úti, ákoni apásika sayá'ikeovi ne Itukó'oviti. ³²Itea éxokovi pahúnevo úti ne Itukó'oviti koane évekovi kotívetike koekúti maka hákone pahukópokono úti ipihóponovokutike, kuteâti kixókonokumo ne po'ínuhiko xâne yara kúveu mêm.

³³Koeku kó'iyeaneye, ítínoe mbo'ínu xoko Kristu, kixákakanoeokopo, hako inuxó kê níki enepo he'uxápu puyákoponeova yokóvo ne ivókinovovi Vúnae. ³⁴Enepo áva xâne épeu hímakati xepákukeno, yusikóne koímataxeovo óvokuke inúxotike tumúneke píhea êgereja, maka hákone motókeinokoe sayá'ikeekonomo enepo he'uxínapanoe ne pâum yoko ekâti. Kene ne po'ínuhiko koekúti ânja ngoúrapu'íkinopinoe, ngoyuhó'inopeatimo nzimané'e xepákukeno.

Véxone vitúkea ítukeke Vúnae, pónevike Itukó'oviti

12 ¹ Itínoe mbo'ínu xoko Jesus, kó'oyene ngoyuhoâtiko koêku ne vípara xoko Sasá'iti Omíxone Itukó'oviti, enepone véxone vitúkea ítukeke Vúnae, ngaha'âti yéxi koêku. ² Yéxoponoanoe kêku nóvo avô'o yêxa Itukó'oviti pihohí kél'iyi ikéneke sánduhiko ákoti yumapápi, kuvovohí kixeâtinoe. ³ Énomone ngahá'aino yéxinoe ákoyeamo ápahuina xâne ihákoti Jesus, koeku ítúkeovo ya xunákoke Sasá'iti Omíxone Itukó'oviti koyúhoyea. Koane ákomaka xâne motovâti íhaxea Jesus únae enepo hákoti itukóvo vo'okuke ne Sasá'iti Omíxone Itukó'oviti ya xokóyoke.

⁴ Ako tôpi kó'iyevoku exóneti íparaxeovike Sasá'iti Omíxone Itukó'oviti, véxone vitúkea ítukeke Itukó'oviti, itea poéhaxo ne porexó'oveati. Énomone ne Sasá'iti Omíxone Itukó'oviti. ⁵ Kúteanemaka koeku ákoyea tôpi ítukexeovike ne Itukó'oviti, itea poéhaxo ne Vúnae. ⁶ Ákomaka tôpi kíxoaku úti vikó'itukexea ne vípara, itea poéhaxo ne Itukó'oviti, enepone ko'ítuketi xoko uhá koeti úti, enepone kousókoatimaka uhá koêti ne itukéti. ⁷ Enepone véxone vitúkea póhutihiko úti ítukeke Vúnae, pónevike Sasá'iti Omíxone, ikó'iparaxinoveake motovâti koúkoponeokoko úti ikéneke Itukó'oviti. ⁸ Vo'oku ápe xâne éxoti koyúhoyea xapa xâne ne exóneti íhae xoko Itukó'oviti, ikó'iparaxoake Sasá'iti Omíxone Itukó'oviti. Kene po'ínuhiko, ikó'iparaxoa Sasá'iti Omíxone Itukó'oviti éxea koúhapu'ikino po'ínuhiko xâne isoneúti íhae xoko Itukó'oviti. ⁹ Kene po'ínuhiko xâne, ikó'iparaxoa Sasá'iti Omíxone Itukó'oviti ítúkeovo hána'iti kuvóvoti Itukó'oviti. Koatímaka énomopone ne Sasá'iti Omíxone Itukó'oviti iko'iparaxo po'ínuhiko xâne xunakóti koíteovo ka'arínatihiko. ¹⁰ Kene po'ínuhiko, ítúkea iyupánevoti ko'íparahiko. Ina apémaka ne ko'ípârati koyúhoyea xapa xâne koekútihiko éxokoake Itukó'oviti. Kene po'ínuhiko, ko'ípara éxea úkeaku ne yuhôti, ítúkeovo ukeâti xoko Itukó'oviti, áko'o ítúkeovo pó'iti úkeaku. Ina apémaka ne xâne ko'ípârati éxea koyúhoyea inámati yuhôti ákoti exoâti kixó'ekone. Kene po'ínuhiko, ko'ípara éxea koúrapu'ikopea kixó'ekone ne yuhôti kuteâti. ¹¹ Itea poéhaxo ne ko'ítúkeati uhá koêti ra koekúti, enepone Sasá'iti Omíxone Itukó'oviti. Pohú pohu kíxoa pórekexea póhutihiko kuteâti ínixone unátiyeya ikó'iparaxea.

Kutí koe póhutipone koxe'úti ne kutípotihiko Kristu

¹² Yoko kuteâti koxe'u úti poéhayea, itea kóyeane enó'iyeya iháxakexoku, yoko kuteâtímaka ítúkeovo póhuti koxe'úti itukôa uhá koêti ne iháxakexoku, énomonemaka koéneye úti ikéneke Kristu. ¹³ Vo'oku poéhaxo ne Sasá'iti Omíxone Itukó'oviti, enepone kasasá'ikopotí uhá koeti úti, porexó'ovitímaka vitúkeovo kuteâti póhutipone muyôti ikéneke Vúnae, yusíkotí vitúkeovo júdeu, áko'o ákoyea vitúkapa, yusíkotímaka vitúkeovo akaúti, áko'o ákoyea vitúkapa. Poéhaxomaka ne Sasá'iti Omíxone Itukó'oviti ovo'ó koe'éviti, enepone kutí koeti koati únati úne vítoponovo, enepone yupihóvoti koúhepekeovi.

¹⁴Yoko hainámaka póhutine kó'iyevoku yoko póhutine itúkovo ne muyo úti, itea êno iháxakexoku, koane ako akútikoko itúkovo ne póhutihiko. ¹⁵Nánimeaa ákoeye enepo akahá'a haxákeovo muyo úti ne heve úti vo'oku ákoyea itúkapu vo'úti? Yusíkotini kahá'ayea, itea kóyeane ni itúkeovo poixo'o muyo úti. ¹⁶Nánimeaa ákoeye akahá'amaka haxákeovo muyo úti ne keno úti vo'oku ákoyea itúkapu ukêti? Yusíkotini kahá'ayea, itea kóyeane ni itúkeovo poixo'o muyo úti. ¹⁷Itukápuni ainová koeti ukêti ne muyo úti, ákoni omótova kámea úti. Koáneni ainová akôe kenôti, ákoni omótova voméhoeya. ¹⁸Itea pahúkoa Itukó'oviti ápeyea koxé'uke úti ne póhutihiko iháxakexoku kuteâti iníxone unátiyea. ¹⁹Eneponi akútikoko ne uhá koeti iháxakexoku muyo úti, ákoni itúkapu muyôti yanê'e. ²⁰Kaná'uti ákoyea tôpi iháxakexoku muyo úti, itea kóyeane poéhayeane ne muyo úti.

²¹Nánimaka ákoeye eneponi “Ako ongónokopi” ixâ vúke ne vo'u úti? Koáneni “Ako ongónokopi” ixâ tuti úti ne heve úti? ²²Itea ya koêkuni kó'iyeaneye, enepohikone iháxakexoku muyo úti vínixone ákoyea itápana unako koêku po'ínuhiko, kóyeane kónokea úti. ²³Koáne ne iháxakexoku muyo úti ákoti úhene, koati katarákoati úti. Koáne ne teínoke úti noíxeokono, vitúkinoa rama'úxoati. Yane, inamá'axone kouhé'ekoa úti. ²⁴Itea enepone iháxakexoku muyo úti ákoti teinâ úti noíxeokono, ako apásika kíxeaneye úti. Yoko enepone kíxoaku Itukó'oviti itúkea ne muyo úti, kíxínoakeneye porexoâti yupíheovo kátarakeovo ne iháxakexoku muyo úti ákoti itapána unako koêku ne po'ínuhiko iháxakexoku. ²⁵Kíxínoakeneye Itukó'oviti, maka hákone pihí'fkoko ya kónokeovohiko, kaha'aínoatihiko kó'okoponeokoko yane kixoku itúkeovo ne póhutihiko, ya koeku kutikokó kó'iyehiko kátarakeokoko. ²⁶Yane, ati'úi koêku ne póhuti xapákuke, eópamaka uhá koeti po'ínuhiko kuteâti eópone nê'e. Koane kauhé'ekakana póhutiya, kutí koémaka kíxeokononeye uhá koeti po'ínuhiko.

²⁷Itínoe póhutipone kutí'iyea itínoe muyo Kristu koeku itúkeovo énomone kotúti úti. Yoko péhutinoe, hane kéneye kuteâti iháxakexoku mýto. ²⁸Kúteanemaka koêku ya xapákuke uhá koeti kutípoti Jesus, enepone ho'uxínovati ne itúke: Inúxotike, kóusokoa Itukó'oviti neko inúxotihiko noívokoe Kristu, páhoe koyúhoyea emó'u, enepone ápostuluhiko. Ikénepoke nekôyo, kóusokoamaka Itukó'oviti ne porófetahiko, enepohikone koyúhoti éxokoake Itukó'oviti koyúhoyea xapa xâne. Kene ikénepoke nekôyohiko, kóusokoamaka Itukó'oviti ne ihíkaxeati emó'u. Ina keno'ókomaka ne itúkotihiko iyupánevoti, koáne ne koitóvotihiko ka'arínetai, yóko'omaka ne éxoti huvó'oxea po'ínuhiko, koánemaka ne éxoti inúxino itukéti, yóko'o ne ko'ipâratí koyúhoyea po'i kó'iyevoku yuhôti ákoti exoâti kixó'ekone. ²⁹Ako ainová ákoe ápostulu. Ákomaka ainová ákoe porófeta, itukovo ihíkaxoti emo'u Itukó'oviti, itukovo itúkoti iyupánevoti. ³⁰Ákomaka uhá ákoe itúkeovo ko'ipâratí éxea kóiteovo ka'arínetai, itukovo ko'ipâratí koyúhoyea po'i kó'iyevoku yuhôti ákoti exoâti kixó'ekone, itukovo ko'ipâratí kóurapu'íkino po'ínuhiko xâne kixó'ekone ne yuhôti kuteâti. ³¹Kéxuna'ixapuikopo yopósiki xoko Itukó'oviti ne koati únatinoe iparáti íparaxeovike.

Yoko enepone koati únateoxo ya uhá koêti, énomone ne ngoyúhoinopikenoemo kó'oyene.

Seanákoti

13 ¹Mani motovâti énjea ngoyúhoyea uhá koêti ne yuhôti koyúhone xâne yara uhá koeti kúveu mêmum, koánemaka ne yuho ovoxe Itukó'oviti íhae vanúke, enepone ánjuhiko, itea eneponi hákoti indukovo seánati, mani kutí ngoeti koati hónoti emo'u tóhe ixukovohí koêti, itukovo koati hónoti emo'u pé'utinoe haváva ixukohí kixonéti. ²Yusíkotinimaka ngo'íparayea ngoyúhoyea xapa xâne koekútihiho éxokonuke Itukó'oviti, itea eneponi hákoti indukovo seánati, ákoni itóponone nê'e. Koane eneponi enjá uhá koeti kixovókuti yupihóvoti hé'oneovo, ákoti po'i xâne exoâti, koane uhá koeti exóneti apêti, itea eneponi hákoti indukovo seánati, ákoni itópoinonuke. Kúteanemaka koeku eneponi indukupu hána'iti kuvóvoti Itukó'oviti kutí'inoke mani itúkoti emó'um ne koati hána'iti mopôti, eneponi mbahukâ ahíkuxeova ne ókoku, ákoni itóponone nê'e eneponi hákotimaka indukovo seánati. ³Yusíkotinimaka heú ngíxea mbôrekexea índukevo ne ákoti apeñoati, koane usó ngóyeyea oró'onginovo po'i xâne yúkuke, anje'ókopati motovâti íteovo, itea eneponi hákoti itukovo vo'oku indúkeovo seánati, ákoni itópoinonuke. ⁴Enepone kaná'uti seanákoti, enepone koati kaná'uti ákoyea omótova vokóvo ne po'ínuhiko xâne, harâ'a: Koati ákoti vímauvo, váhatimaka vitúkino únati po'ínuhiko xâne. Ákomaka ópoe'ainoa visóneu ne koêkuti xâne vo'oku víyokeova ne unako koêku. Ákomaka viháyu'ikapapu. Ákomaka kapáyasakinapa úti ne po'ínuhiko xâne. ⁵Utímaka xâne koyúseoti kixoku itúkeovo. Ákomaka ópoe'hane unako koeku úti vopósi'ixo, itea vopósi'ixinoamaka unako koêku ne po'ínuhiko úti. Ákomaka í'imaikovo vákoe, koane ákomaka vunáka visóneuke ne koêkuti kotivé'eviti. ⁶Ákomaka aélokea vokóvo pahúnevo ne po'ínuhiko xâne, itea elókea vokóvo ne ponóvoti kixovókuti. ⁷Ako vímaxapa ne uhá koeti tiú'iti koekúti tokópone úti. Poéhanemaka únati koekúti vupákinoa ne po'ínuhiko xâne. Ákomaka vímaxapa kúxoixea úti kousokeovo ne kúxoixone úti, koane vítoa tarú'uxea úti uhá koeti koekúti. ⁸Ákomo uké'eyeaku ne ákoyea omótovokoko vokóvo. Itea enepone koyúhoyea úti xapa xâne ne ihíkavvoti éxokovike Itukó'oviti, apêtimo hunókoku nê'e. Koánemaka ne koyúhoyea uti po'i kó'iyevovoku yuhôti ákoti exoâti kixó'ekone, apêtimakamo hunókoku nê'e. Kúteanemaka koêku ne kó'exoneyea úti koekúti yara kúveu mêmum, simotímo káxe áko'oyeakunemo nê'e. ⁹Enepone véxone kó'oyene, ako apáya'ina, vo'oku êno po'ínuhiko koekúti ákoti vexâ. Kúteanemaka ne koyúhoyea uti xapa xâne ne éxokovike Itukó'oviti, enómaka po'ínuhiko koekúti kuteâti ákoti vexâ. ¹⁰Itea simapúne ne káxe iyúseopeakumo uhá koêti, yanê'e hunókokunemo ápeyeya poixô'o ákoti vexâ.

¹¹Noixó íxea râ'a: Enepo indukóvoiko kalivôno, enepone ngoyúhoyea koane eómbone yoko ngxokoku ngo'ísoneueyea, áinovo kuteâti itúkeovo kalivôno. Itea mbaya'íne, ákone angútea itúkeovo kalivôno. ¹²Vo'oku yara koeku kó'oyene, kutí koe komomâti úti noixeðvoketike ákoti koati unátiyea. Itea simapúne neko káxe, kutí koetímó enepo noinoné kixoíxokoko úti ákoti itopâti. Yara koeku kó'oyene, ápe ákoti enjá, itea yaneko káxe, heú ngxoâtimo énjea, kuteâti koeku heú kíxea éxea ngxokoku indúkeovo ne Itukó'oviti.

¹³Anéyeiko ra kúveovo úti, yóko'o ra kúxoixea úti ne véxone kousokeovomo, koánemaka ra ákoyea omótoovokoko vokóvo. Itea enepone koâti únati ya uhá koêti, énomone ne ákoyea omótoovokoko vokóvo.

Unatí'oxo véxea koyúhoyea uti emo'u Itukó'oviti xapa xâne

14 ¹Itíkauptikopone ákoti omotóvokoko okóvo, koane yépemamaka Itukó'oviti ikó'iparaxeopinoe yéxone itfki itukeke, ínapoxo ne keyúhoyi xapa xâne ihíkavoti kouhupu'ikinopike Itukó'oviti. ²Vo'oku enepone koyúhóti po'i kó'iyevoku yuhôti ákoti exoâti kixó'ekone, haina xâne yúho'ixo, itea koati Itukó'oviti yúho'ixo, vo'oku ako xâne exeâti yúho. Koáhati koyúhóti kaná'uti kixovókuti poréxoake Sasá'iti Omíxone Itukó'oviti koyúhoyea ákoti exoâti kixó'ekone. ³Itea enepone xâne koyúhóti ihíkavoti kouhupu'ikinoake Itukó'oviti, koati xâne yúho'ixo. Yoko eneponeê'e, koukoponea xâne ikéneke Itukó'oviti itúko, koane enékeahiko yoko kouhepekea isóneu ikéneke Itukó'oviti. ⁴Kene xâne koyúhóti po'i kó'iyevoku yuhôti ákoti exoâti kixó'ekone, ihuúpinovane ne koyuhoâti. Itea enepone koyúhóti xapa xâne ihíkavoti kouhupu'ikinoake Itukó'oviti, porexo uhá koeti po'ínuhiko xâne ya imokóvokutike koukoponeovo ikéneke Itukó'oviti.

⁵Ehá'ani uhá ké'iyi peréxikono keyúhoyi po'i kó'iyevoku yuhôti ákoti exoâti kixó'ekone. Itea enepone koâti anjá'ínopinoe, énomone keyúhoyi xapa xâne ihíkavoti kouhupu'ikinopike Itukó'oviti. Vo'oku enepone koyúhóti ihíkavoti kouhupu'ikinoake Itukó'oviti, yupihóvone unátiyea ípara yane ko'íparayea koyúhoyea po'i kó'iyevoku yuhôti ákoti exoâti kixó'ekone. Itea enepo áva exoâti koyúhopinoa po'ínuhiko xâne ya imokóvokuti kixó'ekone ne yuhôti kuteâti, hainápo únatimo, maka uhá ákoene xâne imokóvokutike ukóponea ikéneke Itukó'oviti vo'ókuke. ⁶Itínoe mbo'ínu xoko Kristu, itukovo nzimôti xepákuke ngoyuhópoinopiti po'i kó'iyevoku yuhôti ákoti exoâti kixó'ekone, ákoni itópoinopike. Má'aina itukapu ihíkavoti kouhupu'ikinonuke Itukó'oviti ngoyúhopoinopinoe, hainápo mani apêti itópoinopike. Kúteanemaka koêku áva po'i exóneti ukeâti xokóyoke omínombikenoe, áko'o itukovo po'i kouhupu'ikinonuke Itukó'oviti, áko'o itukovo kaná'uti kixovókuti nókone uti véxea hó'eke úti.

⁷Noixó íxea ne huxôe kuteâti étakati, áko'o árpa ákoti okoyúho, itea oxôvo, ápe emó'u. Kene enepone opoéha koêku ne híyeu emó'u, ákoni

iyúsea óxokena, haína? Hainâra koéneye. ⁸Kúteanemaka koêku ne huxo húndaru, enepone kornéta kixonéti. Enepo hákotimo koyúseokono óxeovo, enepo ihaxíka húndaru xapa isukókoti, ákomo éxa húndaru itúkeovo ihaxíkokonoti. ⁹Énomonemakamo kénenoe. Enepo hákoti keyúho emo'úti éxone po'ínuhiko úti, yanê'e namo kíxoaye éxeahiko yíúho? Kutí ketímo xâne koyuhóheoti. ¹⁰Ako yumáxapu kó'iyevoku yuhôti yara kúveu mêum yoko aínovo koati iyúseoti kíxone. ¹¹Itea enepo hákoti enjôa yúho ne yuhó'ixonuti, kutí ngoinoâti íhae po'i poké'e, pó'iti emo'úti yúho, epó'oxo kutí koetímakamo íhae po'i poké'e ne yuhó'ixonuti, pó'itimaka emo'úti koyúho. ¹²Kúteanemaka koêku yane kehá'ayi ápeyea ikó'iparaxeopike Sasá'iti Omíxone Itukó'oviti, yéxone itíki itukeke Itukó'oviti. Yusikóne yopósiki inúxotike ya uhá koêti ne iparáti koukóponoatimo ikéneke Itukó'oviti ne po'ínuhiko xâne êgerejake.

¹³Yanê'e, enepone koyúhoti po'i kó'iyevoku yuhôti ákoti exoâti kixó'ekone, yusikóne épemea Itukó'oviti poréxeamaka éxea kixó'ekone, motovâti kouřapu'ikinoa ne po'ínuhiko xâne. ¹⁴Vo'oku itukovo indúkoti orásaum ya po'i kó'iyevoku yuhôti ákoti exoâti kixó'ekone, koati Sasá'iti Omíxone Itukó'oviti yuhó'ixo Itukó'oviti ya njokóyoke, itea ako íta inzóneu éxea koêku. ¹⁵Ná'ikopomo ángoeye? Indúkotimo orásaum koeku itúkeovo Sasá'iti Omíxone Itukó'oviti yuhó'ixo Itukó'oviti ya njokóyoke ákoti indâ ênjea kixó'ekone ya inzóneuke, koane yunzó'ixotimakamo Itukó'oviti ya exoâtike inzóneu. Kúteanemaka koêku imongóvo. Imongóvotimo koeku itúkeovo Sasá'iti Omíxone Itukó'oviti imokóvo ya njokóyoke ákoti indâ ênjea kixó'ekone ya inzóneuke, koane imongóvotimakamo ya exoâtike inzóneu. ¹⁶Itukovo iheyú'ikoti Itukó'oviti koeku itúkeovo ne Sasá'iti Omíxone Itukó'oviti koyuhô ya xikóyoke, keyúhoti emo'úti ákoti exoâti kixó'ekone, namo kíxoaye “Amém, énomone ákoeneye” kó'iyea ne xâne xepákuke ákoti ípara kuteâti, enepo yuke'éxa íkero'ixivo xoko Itukó'oviti? Koáhati ákotimo exâ ne yíúho. ¹⁷Kaná'uti mbiú kíxi íkero'ixivo xoko Itukó'oviti, itea akó'oti huva'áxa po'ínuhiko xâne, vo'oku ákoyea éxa ne yemó'u. ¹⁸Koati ingoró'ixovoti xoko Itukó'oviti vo'oku ngo'íparayea ngoyúhoyea po'i kó'iyevoku yuhôti kuteâti, epó'oxo xunané'e njokóyoke yane uhá ketínoe. ¹⁹Itea ya imokóvokutike, yusikóne ngoyúhoyea kali singu koeti emo'úti ya exoâtike inzóneu motovâti ínzikaxea po'ínuhiko xâne, yane ákoyea yumáxapu yúnzo ya po'i kó'iyevoku yuhôti ákoti exoâti kixó'ekone.

²⁰Ítínoe mbo'ínu xoko Jesus, hako kutí kenôe kalivôno ya kixeku itíki iséneu. Itea ya váhereke kixovókuti, hainápo kutipasí yákoé koati inámatiko kalivôno âvoti éxoneya. Kene ya kixeku itíki iséneu, kutí yákoé úsotine xâne éxotine kixoku pónea isóneu. ²¹Yane Ponóvoti Kixovókuti yútoe Muíse, ha kôe yuho Itukó'oviti:

“Hanemo veínoam yúnzo'ixea ra xanéhiko íhae yâye enepomo ingaítapanahiko kotíveti, xanéhiko íhae po'i poké'e koyúhoti po'i kó'iyevoku yuhôti ákoti itukapu éxone xanéhiko íhae yâye, itea kóyeané ákoyeamo akútiponuhiko” kôe Vúnae.

Izâiya 28.11-12

²²Yane iyusé kóyeikopo itúkeovo hoénaxovope xunako Itukó'oviti ne koyuhó'iyeani po'i kó'iyevoku yuhôti ákoti exoâti kixó'ekone. Itea haina hoenâxovopeti xoko xâne kutípoti Itukó'oviti. Koati hoénaxovope xunako ipíhophonope Itukó'oviti xoko xanéhiko ákoti akutípea emó'u. Kene ne yuho xâne koyúhóti ihíkavvoti kouhâpu'ikinoake Itukó'oviti, koati koukóponoti xanéhiko kutípoti emo'u Itukó'oviti, kene haina vo'oku xâne ákoti akutípo Itukó'oviti ápeino nê'e. ²³Itukapu he'uxínovotinoe ítuke Itukó'oviti ina tirixápunoe keyúhoyi po'i kó'iyevoku yuhôti ákoti exoâti kixó'ekone, ina urúkapu xâne ákoti itukapu íhae xepákukeneo, itukovo xâne ákoti éxa emo'u Itukó'oviti, koyuhópitinoemo ítíkivo pepokéxovoti. ²⁴Itea enepo yokoyúhonoé ihíhauvoti kouhâpu'ikinopike Itukó'oviti, ina urúkapu xâne ákoti itukapu íhae xepákukeneo, itukovo ákoti éxa emo'u Itukó'oviti, yu'oxeâtimo isóneu emo'u Itukó'oviti, koane inixópovotimo ítúkeovo pahukóvoti vo'oku yiúhonoé. ²⁵Kouhâpu'ikinokonoatimo ne isoneúti oveâti isóneuke ákoti po'i exoâti. Yane ipuyúkexotimo iháyu'ikea Itukó'oviti, koane koyuhoâtimo ítúkeovo koati kaná'uti ápeyea Itukó'oviti xepákukeneo.

Konókoti kóyuseyeovo ítúkeovo ne uhá koeti xâne ya imokóvokutike

²⁶Ná'íkopomo koéneye, ítínoe mbo'ínu xoko Jesus? Enepo he'uxínovonoé ítuke Itukó'oviti, ápe po'ínu úti imokóvoti. Kene po'i xâne, anêko ihíkavvoti hó'êke úti áha íhikaxea. Ina apémaka xâne koyúhóti ihíkavvoti kouhâpu'ikinoake Itukó'oviti. Ina keno'óko po'ínu koyúhóti po'i kó'iyevoku yuhôti ákoti exoâti kixó'ekone. Ina apémaka kouhâpu'ikoati kixó'ekone neko yuhôti. Uhá koeti nê'e, ítúkapuikopo koukóponea po'ínuhiko úti ikéneke Itukó'oviti ítúkinokono. ²⁷Kene enepo áva xâne xepákuke koyúhóti po'i kó'iyevoku yuhôti ákoti exoâti kixó'ekone, ako yusíka anú'ukea pí'âti, áko'o mopo'âti koyuhoâti kuteâti nê'e. Epó'oxo konókoti ahe'ó ahe'o kíxeokoko ne koyuhoâti. Ako yusíka xane-xané kíxeokoko koyúhoyea ne uhá koéti ya póhuti pího. Koane konókotimaka ápeyea koyuhópati kixó'ekone neko yuhôti. ²⁸Kene enepo hákoti xâne ko'ipâráti éxea koyúhopea ne kixó'ekone, yusikóne yunú kóyeyea kúveuke imokóvokuti ne xâne mani koyúhóti po'i kó'iyevoku yuhôti kuteâti. Yusikóne ítúkea orásaum ya isóneuke yuhó'ixoti Itukó'oviti ákoti kahanáka emó'u. ²⁹Kene ne koyúhóti ihíkavvoti kouhâpu'ikinoake Itukó'oviti, ópohane pí'âti, áko'o mopo'âti koyúhóti, koékune. Kene ne po'ínuhiko xâne êgerejake, apásikahiko éxea úkeaku ne yuhôti ítúkeovoxo ukeâti xoko Itukó'oviti áko'o ákoyea. ³⁰Enepo áva po'ínu úti vatá koyétiya simó koati kouhâpu'ikinoake Itukó'oviti, nókone koyúhoyea xapa xâne, konókoti kóyunukeovo ne inúxoti koyúhóti motovâti koyúhoyea ne pô'i. ³¹Vo'oku motóva heú kél'iyi keyúhoyinoé kouhâpu'ikinopike Itukó'oviti, ahe'ó ahe'o kixekókoti, motovâti heú kél'iyi ápeyea inámati yéxone xoko Itukó'oviti, koane motovâtimaka kóxuna'ixikoko ikéneke Itukó'oviti. ³²Yoko koati motovâti sayá'íkopeovo ne xâne koyúhóti emo'u Itukó'oviti. Ápe xunáko koyúhoyea koane kóyunukeovo. ³³Vo'oku haina ahá'ínovi Itukó'oviti ákoyea úxepaka koeku úti ya imokóvokutike, itea kahá'a kóyuseyeovo vitúkeovoya.

Kúteanemaka koêku ya uhá koeti imokóvokuti xapa kasása'iupo Itukó'oviti, ³⁴konókoti yunukú kóyeyea ne senóhiko imokóvokutike. Ako yusíka koyúhoyea. Konókoti itúkeovo kutípoti kuteâti koeku fhikaxeovi ne Ponóvoti Kixovókuti yútoe Muíse. ³⁵Itukovo kaha'âti éxea koêku ne ihíkavoti, épema'ika îma seâpa óvokuke, vo'oku mani hána'iti téyapana enepo okoyúhohiko imokóvokutike.

³⁶Poé'ainoamea iséneu ra yúnzo pe'okoâti yéxi ponóvoku ra koekúti ya undíke? áko'o ikitíxatimea koati úkeaku ne kaná'uti kixovókuti emó'uke Itukó'oviti xepákukenoe, koane poéhayeane itínoe ápeino ne emo'u Itukó'oviti. ³⁷Enepone xâne inixópovoti itúkeovo koyúhoti ihíkavoti kouhupu'ikinoake Itukó'oviti koyúhoyea xapa xâne, koáne ne xâne inixópovoti itúkeovo kuri'ókovoti Sasá'iti Omíxone Itukó'oviti, exoâtimo itúkeovo koati páhoenopi Vúnae ra yúndoenopinoe. ³⁸Itea enepone xâne ákoti itúkoake ra yúndoe, enomónemo ako itúkokonoke nê'e.

³⁹Énomone ngixínopi, itínoe mbo'ínu xoko Jesus, yusíkea itúkeovo keyúhoyi ihíkavoti kouhupu'ikinopike Itukó'oviti keyúhoyi xapa xanéhiko, kehá'axo ke'íparayi. Kene ne xâne koyúhoti po'i kó'iyevoku yuhôti ákoti exoâti kixó'ekone, hako seya'íkoa. ⁴⁰Itea uhá koeti itukéti ya imokóvokuti, konókoti kóyuseyeovo koane póneovo koêku.

Kixó'ekone exépukepa Jesus ukópea xapa ivokóvoti

15 ¹Itínoe mbo'ínu xoko Kristu, ngahá'ainopinooe puyákoponeova yokóvo ne inámati ihíkavoti koyúhoti koeku Jesus ngoyúhoinopike, enepone kitíponenoe yoko hékone tukú koeti kó'oyene. ²Énomonemaka porexópi yenópimo xoko Itukó'oviti, enepo hákotimo kirikôa héki ne ínzikaxopike kuteâti koeku héki inâ nemukoânoe. Kene hákoti koené'eye, koati itukohí kixeâti héki inúxotike.

³Enepone ihíkavoti éxokonuke Itukó'oviti, enepone koati nokonéti kutípeokono ya hó'eke úti, enepone ínzikaxopikenoemaka yanekôyo, énomone ne koêti: Ivókinovovi Kristu porexópoti ésa'i pahúnevo úti, kuteâtimaka kó'iyea yane yutoéti emó'uke Itukó'oviti, ⁴koane ekóxokonomaka, itea exépukepa ukópea xapa ivokóvoti ya mopó'apeke káxe, kuteâtimaka kó'iyea emó'uke Itukó'oviti. ⁵Éxokopovomaka Péturu, koáne ikénepoke éxokopovomaka po'ínuhiko fhikau, eneponeko nduse koêti. ⁶Ikénepoke, ápemaka po'ínuhiko úti xoko Vúnae noixópatimaka ya póhutike pího. Yoko anú'uko singu koeti séndu nekôyohiko. Xapákuke neko noixópati, enoné'e apétiko, itea ívohikovone po'ínuhiko. ⁷Yane noixopamaka Teâku. Ina noixópatimaka uhá koeti ápostulu, enepohikone páhoe Vúnae koyúhoyea emó'u xapa xâne.

⁸Yane koati ikenétike, ínamaka exókopovonu, undi ákoti kuxoâti kó'iyeaneyea kuteâti koeku kalivôno veó koêti ipúhikea. ⁹Vo'oku undi koati yupihóvoti ákoyea itóponone xapákuke ne po'ínuhiko ápostulu. Ako omóndokea ínzaxeokono ápostulu vo'oku êno íngoitoponeahiko kotíveti ne ho'uxínovoti ítuke Jesus nóvo, ngaha'âti ungé'exe. ¹⁰Itea enepora ngoépoku kó'oyene, koati vo'ókuke ne hána'iti seánakonu Itukó'oviti njokóyo. Yoko ako porehí íxana

ra hána'iti seánakonu. Ápe pôreupo, vo'oku undíne yupihóvo ko'ítukeyea ya uhá koeti po'ínuhiko ápostulu, páhoe Vúnae koyúhoyea emó'u. Itea haina úndi kixopóvoneye. Koatíne hána'iti seánako Itukó'oviti ko'ítúke ya njokóyoke. ¹¹Ákomaka yuvâti itúkeovo úndi perekáxo, áko'o itúkeovo po'ínuhiko ápostulu, koati énomone koyúho uhá koeti úti, yoko énomonemaka kitíponoe.

Kaná'uti exépukopeamo ne xanéhiko ukópea xapa ivokóvoti

¹²Koeku koyúhoyea úti xapa xâne kaná'uyea exépukopea ne Jesus ukópea xapa ivokóvoti, ná'ikopo koeti ápeino xâne xepákukenoe koyuhoâti ákoyeamo exépukapa ne ivokóvoti? ¹³Eneponi akoéneikopoye ákoyeamo exépukapa ne ivokóvoti, ákonikopomaka akána'u exépukopea ne Kristu. ¹⁴Kene eneponi hákoti kanâ'u exépukopea ne Kristu, ákonikopo itóponone ne koyúhoyea úti koeku Jesus, epó'oxo ákonimaka itópinopike kitípi. ¹⁵Koane enepone koyúhoino uti Itukó'oviti, mani ainóvotikopomaka yuhôti semekékexoti, koeku koyúhoyea úti itúkeovo koéxepoepo Itukó'oviti ne Kristu ukópea xapa ivokóvoti. Yoko ákoni íxaneyea Itukó'oviti eneponi hákoti exepúkopo ne ivokóvoti.

¹⁶Koáne, eneponi hákoti exepúkopo ne ivokóvoti, ákoni akána'u exépukopea ne Kristu. ¹⁷Eneponi akaná'umaka ákoyea exépukapa ne Kristu, ákonikopo itópinopike kitípinoe, koane mani pahunévotike yóvoheixoiko ákotine yasadá'ipi ne pehúnevo. ¹⁸Haina póhutine nê'e, itea enepone ivohíkovotine kutípoti Kristu, mani evókovotine yonópotihiko ipihóponovokutike. ¹⁹Eneponi itukápuikopo póhutine yara kúveu mêum ápeyeya kúxone úti xoko Kristu, mani uti koâti kixeóvovoti ya uhá koeti xâne yara kúveu mêum.

²⁰Itea koati kaná'uteoxo exépukopea ne Kristu ukópea xapa ivokóvoti. Koati énomone itukóvo inúxoti exepúkopotí ya uhá koeti ivokóvoti exepúhikopotimo. ²¹Vo'oku kuteâti koeku turíxeovo ápeyeya ivokóvoti yara kúveu mêum vo'oku póhuti hóyeno, énomonemaka koéneye ápeyeya exepúkopotimo ukopeâti xapa ivokóvoti vo'oku po'i hóyeno. ²²Kuteâti itúkeovo vo'oku Ádaum ivókinovo ne uhá koeti xâne, énomonemaka koéneye itúkeovo xoko Kristu exépukopeamakamo ne uhá koeti xâne. ²³Ápe ne koati inúxoti, ina keno'óko ne po'ínuhiko ikénepoke. Kristu inuxô exépukopo ukópea xapa ivokóvoti. Ikénepoke, ina keno'ókomaka ne kutipoâti. Exepúhikopotimakamo nê'e aukápapu Kristu. ²⁴Yane kousókovotinemó uhá koêti, koane uke'éxeatinemo Kristu xunáko ne tutíyehiko koêkuti pahúkoku, enepone uhá koeti pahúkoti ákoti inixákana híyeu vanúke, koánemaka ne inixóneti yara poké'e, yóko'omaka ne koêkuti po'íhiko xunákoti apêti. Ínamo kuri'ákapa Itukó'oviti, Há'a, ne natíxoku. ²⁵Vo'oku konókotí itúkeovo Kristu natixô imókonemo apayáso ya uhá koêti, uke'éxapeanemaka xunáko ne uhá koeti anáne. ²⁶Yoko enepone vanáne uke'éxokonotimo koati ikenétike, énomone ne pevóti. ²⁷Vo'oku hara kôe emó'uke Itukó'oviti: “Poréxo Itukó'oviti ne Kristu payásoyeya ya uhá koêti”. Enepo koyúho itúkeovo Kristu payasô ya uhá koêti, iyúseo ákoyea itúkapu kixoti payásoyeamo ya Itukó'oviti, enepone porexoâti kó'iyeaneyea. ²⁸Yoko enepo apayásone Kristu ya uhá koêti,

kuri'ókopovatinemo ne Há'a, enepone porexoâti kó'iyeaneye oukeke uhá koêti, maka itúkápune Itukó'oviti payasô oukeke uhá koeti koekúti.

Koati kaná'uti koéxepukopekonomo muyo úti

²⁹Kó'oyene hara ngixópinoe: Eneponi hákoti exepúkopo ne ivokóvoti, nánikopo kó'eye ne xâne ahíkovoti hó'eke úti ya iháke xâne ivokóvotine? Eneponi hákoti exepúkopo ne ivokóvoti, nánikopo koeti ahikinovohiko ya iháke? ³⁰Kene úti, nánikopomaka koeti ixómoino kóxuna'ixovo úti vínonexinovo tiú'iti koekúti ákoti kayunúkavi? ³¹Káxe, káxe ínonenjinovo pevóti. Koati kaná'uti nê'e, itínoe mbo'ínu xoko Jesus, kuteâtimaka kaná'uyea itíkivonoe éyenjovope ikéneke Kristu Jesus, enepone Vúnae. ³²Eneponi yupíheovo ngóxuna'ixeovo índea ne êno kotíveti koekúti ya pítivokonake Éfezu, kutí koe ongópoti êno ipúhokovoti hó'openo. Itea eneponi hákoti ngúxone xoko Itukó'oviti énjone kousokeovomo, kutínikopo itópoinonu ixómoyea ngóxuna'ixovo? Eneponi hákoti kaná'u exépukopea ne ivokóvoti, yusikónenikopo yuíxeovo níkea úti yoko vénoyeovo vo'oku poéhaneni pevóti kúxoixo úti.

³³Hákonoe yaupú'ikopovo yarâ'a: Koêkuti yómoti kahá'ineyeya xâne ákoti kayúsea kixoku itúkeovo, koesáyu'ixokonotimakamo kixoku itúkeovo yane kahá'ineyeya. ³⁴Konókoti iyúkopeovo iséneu kuteâti motókeyea ké'iyi. Hákonenoe ixomo puhukóvo, vo'oku ápeyeya xâne xepákuke ávoti êxa Itukó'oviti. Yoko metókeanoe enepo kateyákapi ra yúnzo.

Inámatimo koépoku muyo úti vexepúkapa vukapêa xapa ivokóvoti

³⁵Ínani áva koêti: "Namo kixó'oye exépukopea ne ivokóvotine? Namo koépoye ne mûyo exepúkapanne?" koetímearo. ³⁶Koati ákoti iséneu itínoe xâne koetíneye yúho! Hane ínzokoa koeku ake nonéti neóne. Konókoti ekóxeokono inúxotike ina ihonópo. ³⁷Epó'oxo enepo neonôe, koati áke né'iyi kuteâti ake tiríku, áko'o itukovo koêkuti po'i ake nonéti. Kene ako ná'iyekana xúve úsotine. ³⁸Koati Itukó'oviti itukínoa kó'iyeevoku ne xuve nonéti, koêkuti ahá'inoa kó'iyeya. Póhutihiko ake nonéti, itúkinoa Itukó'oviti kó'iyeevoku ne xúve. Koêkuti kíxoaku Itukó'oviti, énomone koéneye kuteâti ínixone unátiyeya.

³⁹Ako akútikoko kó'iyeevoku ne uhá koeti apêti omíxone yara kúveu mêum. Pó'iti koêku ne koxé'u xâne yane hó'openohiko. Pó'itimaka koeku koxé'u ne hó'openo ôti yane hôe.

⁴⁰Pó'itimaka koeku koxé'u ne íhaehiko vanúke yane ovâti ra kúveu mêum. Eneponi úhe'ene ne íhaehiko vanúke, koati pó'iti ya úhe'enehiko ovâti ra kúveu mêum. ⁴¹Koati pó'iti úhe'ene ne uhápu'ine káxe yane uhápu'ine kohê. Koane pó'itimaka úhe'ene ne uhápu'ine hékerehiko. Muhíkova xapákuke ne hékerehiko, ako akútikoko úhe'ene uhápu'ine koane xunáko.

⁴²Kúteanemakamo koêku exepúhikapane ne ivokóvoti. Kuteâti koeku ake nonéti inâ nokóno ákoyea akútea koêku ihonópone, énomonemaka koéneye

koxe'u xâne. Pó'iti koêku ekaxápakane, yane exepúkapanane. Ekoxókonone mûyo ne ivokóvoti, pihínoti imúyukea, itea exepúkapanane, itopónoatinemo ne apéyeati ákotinemo hunókoku. Ekoxókonone, ákone aúhe'eka itea exepúkapanane, yupihovó koetímó úhe'ene. ⁴³Ekoxókonone, ákone xunáko itea exepúkapanane, yupihovó koetímó xunáko. ⁴⁴Ekoxókonone, koati muyo xâne yara kúveu mêum itea exepúkapanane, kutipasí koepoâtinemo ne íhaehiko vanúke. Koeku ápeyea muyo xâne yara kúveu mêum, koati kaná'utimaka ápeyea mûyo ne íhaehiko vanúke. ⁴⁵Vo'oku hara kôe ne yutoéti emó'uke Itukó'oviti: “Eneponeko Ádaum, inúxoti hóyeno, poréxokono ómixekuyeovo” kôe. Kene ne simôti hunókokuke, po'i Ádaum kixonéti, enepone Xe'exa Itukó'oviti, énomone porexókonono itúkeovo úkeaku ne inámati apéyeati ákoti hunókoku. ⁴⁶Yoko haina kuteâti koeku apêti ya vanúkeke ne inuxô, itea hane inuxô kuteâti koêku yâye yara poké'e. Ikénepoke, ina keno'óko kuteâti koêku ya vanúkeke. ⁴⁷Eneponeko inúxoti Ádaum itukéti ya móte, koati íhaene yâye yara poké'e. Kene ne pí'ape Ádaum kixonéti, koati úkeakune ya vanúke. ⁴⁸Kuteâti koeku itúkeovo íhae yâye yara kúveu mêum neko inúxoti hóyeno, énomonemaka koéneye ne uhá koeti po'ínuhiko xâne apêti yara kúveu mêum. Koane kuteâti koêku ne hóyeno íhae vanúke, énomonemakamo koéponeye ne po'ínuhiko xâne yonopâtimakamo ne vanúke. ⁴⁹Kuteâtimaka víkutipasikeova ne inúxoti xâne apêti yara poké'e, konokoâtimakamo víkutipasikeova ne hóyeno íhae vanúke, enepone Kristu.

Poe'ápoatimo mûyo ne âvoti ivakápu enepo aukápapu Jesus

⁵⁰Koati ngxópitinoo, itínoe mbo'ínu xoko Jesus, ákoyeamo kalíhuina yonópea natíxokuke Itukó'oviti ne muyo xâne yara poké'e, enepone ainóvoti naúti yoko íti. Enepora muyo úti kó'oyene vekotí'ikomo pevótike, ákomo kalíhuina yonópea xoko Itukó'oviti xoko ákoyeakunemo aúke'e.

⁵¹Énjakapivonoe koúraru'ikinonuke Itukó'oviti, koekúti âvoti exákana yanekôyoke. Ákomo uhá vákoe vivókeovo, itea uhá koépotimo úti ápepeamo inámapoti muyo úti. ⁵²Koati hú koetímó poé'apea ne muyo úti kuteâti hú kó'iyea ne iromíkeati. Énomonemo koéneye enepo axapápune torombétana Itukó'oviti, enepone oxóvotimo auké'ene ra kúveu mêum. Axapúne, exepúhikopotinemo ne ivokóvoti, yoko apêti hiko inámapotine mûyo ákotinemo uké'eyeaku. Yane uhá koetínemo úti poé'apeamaka muyo úti. ⁵³Vo'oku enepora kixeóvovoti muyo úti vekotí'ikomo pevótike, konókotikomo ápeyea inámati koépoku ákotinemo itâ pevóti. Koane enepora muyo úti kó'oyene apêtimo hunókoku, konókoti poé'apea koêku maka hákone uké'eyeaku. ⁵⁴Yaneko káxe ipakápapune koêku ra muyo úti ákoyeakunemo veka pevótike, koane ákoyeakunemo aúke'e, yane tokopóvotinemo ne yutoéti ya emó'uke Itukó'oviti xoko kó'iyeaku: “Vítóane ra pevóti. Koati hunókokune ne ivokeôvoti!” koêti.

Izâiya 25.8

55 “Koati ákotine xunáko ne pevóti. Ákone xunáko íkoitoponeokono kotíveti ne xâne vo'ókuke. Koati uké'etine nê'e” kôe.

Ôzeya 13.14

56 Enepone ápeinoke xunako pevóti iyónopea xâne ipihóponovokutike, koati vo'oku ítúkeovo pahukóvotihiko. Epó'oxo koati vo'ókuke ne Ponóvoti Kixóvókuti, yutóxovoku ne páhoenokono xâne ítúkea, iyúseinoke ítúkeovo pahukóvoti. 57 Itea aínapo ákoe Itukó'oviti, enepone porexó'oviti vítea xunáko ne pahunévoti koane xunáko ne pevóti vo'oku ítúkeinovi Vúnae Jesus Kristu.

58 Énomone ngxínopinoe, itínoe mbo'ínu xoko Kristu ákoti omotóva ongóvo: Kéxuna'ixapu ikéneke Vúnae. Itíkapunoe ákoti motovâti kátavokea yara hó'e úti. Hákomaka momí yakôe ya ítúkeke Vúnae, yexoâti ákoyea évakapu ne ke'ítúkeino Vúnae.

Huvó'oxeake íhae Koríntu ne íhae Njúdeya

16 ¹Kene ne tiúketi hivó'oxikemo ne po'ínuhiko kasása'iupo Itukó'oviti, hane íxeanoe kuteâti yunzó'inoa ne po'ínu úti ya imokóvokutihiko ya Ngalásea. ²Péhutinoe, hexáka ne yêho tiúketi heú koeti lûmingu. Némoe exoâmo yé'akeye ne héxae itukovo lûmingu. Uná una íxeanoe, maka hákone konôko ítixopeovoikomaka nzimané'e xepákuke. ³Enepo nzimapíneno, mbahukoâtimo ne po'ínu úti, koêkuti neívokoemo, motovâti ómea ne tiúketi hivó'oxike ne po'ínuhiko úti ya Njeruzálem, epó'oxo usó ngxinoâtimo ne koyuhópeti ómonehiko, kouhápu'ikovoti ítúkoponovo ke ya xapákuke. ⁴Koáne enepo okonókovo, njaneâtihi komakamoya.

Âha ítúkea ne Poûlu

⁵Ungapeâne Masêdonea, vengopópitinoemo vo'oku koati apêti inzóneu ndarú'uxea Masêdonea. ⁶Ako tópi koêku kali xu'íkeneyeamo óveam xepákuke. Koímaiti herú ngxíxa kaxena kásati xepákuke motovâti hivó'oxinunoe indóponea ne po'ínu yónongumo, nóngonemaka indóponea. ⁷Vo'oku yara koeku kó'oyene, ako angáha'a pohu vekó ngó'iyepinoe, itea ngúxo kali nju'íkeneyeamo xepákuke enepo itukapu ahá'inonu Vúnae.

⁸Kene óvonguikonemo yâye ya Éfezu tukú koeti kaxena ayuúti, enepone Pentekósti. ⁹Vo'oku anéye êno hána'iti itukéti imihé'okinonuti ngoyúhoyea emo'u Itukó'oviti, xaneâtimaka enó'iyea okopónuti.

Koêku ne Timóti yoko Ápolu

¹⁰Enepo simapíneno ne Timóti, yéxaka elókeyea yokóvo símea, maka aúhepene isóneu xepákuke, vo'oku koati ko'ítúkeinotimaka Vúnae nê'e nguteâtine. ¹¹Konókotimaka tíyi nê'e, koane hivá'axa motovâti káyukopeovone yâye njokóyoke ákoti yuvâti. Vo'oku ngxupâtimo aúkopeovo, koánemaka ne po'ínuhiko úti xanépone.

¹²Kene ne Ápolu, po'ínu ûti xoko Kristu, enóne ngoyúhoinoa yusíkea xané'eyea ne po'ínuhiko ûti noixóponopitinoe, itea âvovo akáha'a píhea yara koeku kó'oyene. Simapúne unátiyeaku yónea, kóyeane mo itóponeopinoo.

¹³Yokóhiyanavo, itíkapunoe iyukóvoti isóneu. Áxunamaka iséneu ikéneke Vúnae ákoti itevákinoo héki. Hákomaka píke, koane kékuna'ixapunoe ikéneke Vúnae. ¹⁴Heú koeti ítikeyo, itíka ya ákoyea omótoovokoko yokóvo.

Koêku ne Étefana, Futunátu yoko Ákaeku

¹⁵Kó'oyene anéye anjá'inopinoo, itínoe mbo'ínu xoko Jesus. Yéxoanoe itúkeovo inúxotihiko hokópoti Jesus ya Ákaya ne Étefana yoko uhá koeti xâne óvokuke, koane itúkeovomaka kuri'ókotovihiko Vúnae huvó'oxea kasása'upohiko Kristu. ¹⁶Ngahá'ainopinoo tíyi nekôyohiko koane ákoyea kepáyasakinapa. Énomonemaka yákoyeneye xapákuke uhá koeti po'ínuhiko ko'ítuketi ítuke Itukó'oviti kuteâti nê'e, enepone ha'ínehiko ûti ítukeke Itukó'oviti.

¹⁷Koati elóketi ongóvo koeku símeonu evo Étefana, koane Futunátu yoko Ákaeku, vo'oku êno huvó'oxeonu koeku itúkinonu kuteâti mani ítikeinonu eneponi yáva yâyeke. ¹⁸Koati koughépekopotihiko inzóneu koánemaka iséneu. Motókea itúkeovo koati teyonéti xapákuke ûti ne xâne kuteâti.

ÍkopovoPe Poûlu

¹⁹Yúhoikopinoo ne po'ínu ûti ho'uxínovoti ítuke Itukó'oviti íhae ra poké'exa Ázea. Koati ênoti inákurukeovopi ya ikéneke Vúnae ne Ákila yoko Pirísila, koánemaka ne ho'uxínovoti ítuke Itukó'oviti óvokuke.

²⁰Yúhoikopinoemaka heú koeti po'ínuhiko ûti xoko Jesus yâyeke.

Yíhaikakanoe, siunoné kixekókoti kuteâti kixókokoku ûti yúhoikeokoko ûti, imeâti sasá'ikoke iséneu vo'oku itínoe kopo'ínukokoti xoko Kristu.

²¹Enepora yúndoenopinoo kó'oyene inángurukeovopike, koati yútoe vô'um, undi Poûlu.

²²Koati konokoâti ákoyea omótova vokóvo ne Vúnae Jesus. Koêkuti xâne ákoti akoéneye isóneunoo, motókea yonópeamo ipihóponovokutike.

“Ehá'ani ákoyeane ahíkapu aúkopovoPe ne Vúnae Jesus” ngôe.

²³Itúkapu hána'itike seánakovi Vúnae Jesus yóvoheixonoo.

²⁴Uhá ngxópinoe mbahúkinopi ákoyea omótovopi ongóvo, uti kopo'ínukokoti ikéneke Kristu Jesus.

Hunókokune.